

出使日記續刻

出使日記續刻卷之八

無錫薛福成叔耘

光緒十九年癸巳六月辛亥朔記

厄瓜爾多南墨洲西海濱民主國也自赤道北一度三十八分至赤道南六度二十五分英京西七十度至八十一度北有可倫比亞係今之可倫比亞即新加拉那大古之可倫比亞或合新加拉那大厄瓜爾多東有巴西西南有秘魯西有太平洋形勢狹長東西約七百八十英里南北濱海處最闊約四百八十英里入內漸狹約百英里合十二萬方英里戶口一百二十七萬其民則白人與土人種類相雜亦間有

黑人西有安達斯山爲之障東皆平原之地有亞馬孫河之上游及是河之支流浸灌於其間土產麥可可棉花加非糖金雞那珍珠米大薯烟葉五穀與果樹膠葡萄蠟歲入英金六十萬六千餘鎊歲出五十五萬三千餘鎊國債二百二十五餘鎊國分十六部一埠都城曰奎拖志略作基多厄瓜爾多古屬英開司國繼屬西班牙後叛西班牙與新加拉那大委內瑞辣合爲一國名曰可倫比亞一千八百三十一年始獨立爲國

初二日記

烏拉乖南墨洲東海濱民主國也在巴拉大河口之東

北卽與拉巴拉他

今稱阿根廷

都城

名不宜諾塞利

分界之處西界

烏拉乖江亦與阿根廷分界者也北界巴西東與南皆

濱大西洋緯度自赤道南三十度至三十五度經度自

英京西五十三度二十五分至五十七度四十二分地

得七萬二千一百七十二英方里戶口七十萬國分十

三部先屬西班牙近合阿根廷亦屬葡萄牙又爲巴西

之一省一千八百二十五年始叛巴西又與阿根廷合

而復分遂爲自主之國沿海平坦中央多山土產牛馬

爲大宗米麥珍珠米棉花靛麻烟酒瓜果皆有之農功

僅足自給新法概未聞知鐵路有一百九十英里都城

曰蒙德維罷亦通商總匯處也

初四日記

南亞墨利加有一地東自委內瑞辣西自巴西以達於大西洋岸者歪阿那也分屬英荷法三國英歪阿那者在歪阿那之西偏在南墨洲東北洋岸當赤道北一度至八度之中與荷蘭歪阿那不過可倫汀一江之隔沿洋岸自啞林拿可江口至可倫江口廣二百八十英里自外至內長四百英里地面積爲七萬六千英方里或云十萬九千英方里或云八萬五千四百二十英方里戶口二十七萬七千有奇沿海地形平坦內漸高聳

山嶺之勢東西相趨大江曰義斯給波長約六百英里糖爲物產大宗次則棉花加非會城曰喬諸湯在特默拉拉江口此地先屬荷後屬英英設一官如巡撫並議政收稅各官以治之

初五日記

荷蘭歪阿那介於英法屬地之間西自可倫汀江東至與法屬分界之馬羅南其地約七千五百英方里內地最大之江曰蘇利南約長三百英里江上距洋十英里巴拉馬利波會城在焉會城戶口二萬糖與加非爲出口大宗法歪阿那在歪阿那之東偏自馬羅南江至

與巴西分界之奧含拋克江皆其地也其二萬七千五百英方里戶口二萬二千黑人居四之一法國視爲流徙罪人之所故歐洲人中半多罪犯與監犯之兵土產糖胡椒丁香豆蔻肉桂會城曰加夜那在近洋岸島上有戶口八千地方甚陋加夜那之胡椒則著名

初六日記

新嘉坡總領事黃遵憲稟稱大小白蠟及石蘭莪之吉隆一地產錫最旺華人日增氣象方興未艾擬請大小白蠟共設副領事一員吉隆設副領事一員去歲吉隆出錫益多集工益眾商賈麇集貨物雲屯英官方於大

小白蠟之間建火車路以資轉運。數年之後將成一大都會。華人之商於小白蠟吉隆者多獲厚利。一年之中。小白蠟增工役數萬。吉隆增工役二萬有餘。今歲傭工由閩越至新嘉坡者已有三萬六千。大抵散居於白蠟吉隆者爲多。流寓日眾。良莠不齊。舉凡財產錢債賭博鬪毆之事。慮其輕於犯法。易於啟爭。必設領事可資約束而籌保護。此雖係英人保護之土。各國尙未設官。然此處寄寓祇有華民。並無他族。是中國設官更屬名正言順。先是總督施密司謂白蠟石蘭莪等處皆華民。係英國保護之邦。不必盡用英律。因囑將大清律例

財產各條鈔出已爲鈔戶律戶役門凡八條施督卽譯英文札交各處承審官一體遵辦爲英人絕無僅有之事施督於華民保護甚周其行政時有將就華民之處趁其在位趕設領事此亦事機之不可失者也

初七日記

江南製造局新製一出五槍曰快槍連環不絕命中及遠可駕乎林明敦毛瑟諸槍之上矣又試放之礮計兩種一爲八百磅彈子之後膛大礮一爲四十磅彈子之快礮大礮則長式者重五十二噸口徑十二寸長三十六尺短式者重四十八噸口徑十二寸長三十尺每試

一次食六角一孔栗色火藥三百磅彈出口時每一秒
行二十尺如於相去一千碼遠近可擊穿十九寸厚之
鐵甲彈力所到可擊三十餘里若近海礮臺置一二尊
無論何等鐵艦皆將望而氣沮快礮重二噸有奇長十
六尺二寸口徑四寸七分食黑色火藥十二磅食無烟
火藥僅五磅半一秒時可連放十二尺彈出口時每一
秒可行二千零八寸尺彈力能擊十八里之遠此項快
礮最利於兵船蓋兵船所畏者雷艇耳海面雷艇每千
碼行時八分半而兵船欲瞭見雷艇須在一千五百碼
之內發礮三擊不中則雷艇逼近矣有此快礮則一二

分時內能放二十餘出。每兵船安置三四尊。則雷艇萬不能近逼矣。

初八日記

礮之有彈。猶刀之有鋒。從前中國礮彈。僅造至二百五十磅而止。鋼彈向未造過。十七年春始仿造焉。彈身長四十寸。圍徑十二寸不足。厥有數種。一曰鋼質彈。一曰硬質實心彈。皆攻堅所用。一曰開花彈。彈腔內空。徑六寸半。深三十二寸有奇。可實火藥三十二磅。專爲炸裂擊敵所用。一曰平頭彈。兩頭皆平。如大炭結。然有重一千磅者。八百磅者。專爲試礮而設。至快礮所用各彈。皆

與八百磅彈之用同。彈身長十四寸，口徑四寸七分，不足惟開花彈則與各彈迥異。開花彈置銅引於彈後，不用碰力，專用震力。彈頭仍堅銳，可以攻物，攻穿後再行開花，誠爲利器。又恐彈坯肉厚，鐵塊大而不能碎，乃又別造成數珠彈。視外洋之子母彈，卽譯言沙不乃爾彈也。內皆包小彈，炸裂時無數小彈飛出。惟子母彈式既平頭，不能攻堅。工程又鉅。今因其式而改造之，其外仍用快破開花彈式，內則製成連珠小彈，如手釧式，疊釧十四層。其小彈一百八十九，名曰數珠。殆取牟尼一串之義也。外則包以生鐵，彈既炸飛，而彈身鐵坯亦較

薄炸時易於擊碎。以此制敵。何敵不摧。而工程亦省。較之子母礮。工程僅五分之一耳。滬局現由四十磅推廣至各式大彈。彈內圓式小彈。擬改爲三角小彈云。

初九日記

礮以快名。實恃有銅殼。豫裝火藥。連彈合而爲一。如今之槍彈然。若放礮者。操習嫺熟。卽能連環不斷。較之霍智和士礮。不難駕而上之矣。然礮雖快。彈雖銳。其用又全恃火藥。藥性有暴急而短於力者。有和緩而力能遠者。暴急則易傷腔內螺紋。而送彈不遠。和緩則彈於腔內螺紋。優游旋轉。後力且勁。送彈彌遠。黑色火藥與栗

色藥餅其力不同如此。滬局已有造藥餅機器。則火藥可精益求精矣。畿輔鐵路今分官商兩軌。其由天津而軍糧城而大沽北塘漢沽蘆臺唐坊胥各莊開平古冶一帶。鐵道爲公司集款而成。謂之商路。由古冶至雷莊。雷莊至灤州。業經工竣開車。復由灤州接至山海關。其已成未成各路。一切經費。概由官款發結。謂之官路。

初十日記

余曷慶藹堂赴法外部詰問與暹羅啓釁之故。該部大臣德維勒云。法暹兩國近日局面驟變。皆因暹人受英挑唆。以致愈逼愈緊。問以法國意嚮如何。德云。謂滄江

左岸之地原屬越南近年被暹侵佔逼近越都所設兵卡距越都百里之近法有保護越南之權應令暹羅反其侵地畫江爲界一也法商前在南寧貿易忽被暹官驅逐失業傷財應令暹羅賠償二也法弁越官收復城邑有被暹官謀害者應給卹款三也日前法破船照約入其內河忽被礮臺轟擊沈引水之商輪一艘亦應賠償四也四者之外又須向索兵費以懲開釁應償三百萬佛郎本國派前任西貢總督維勒爾赴暹辦事先告暹羅限兩日答覆大約暹羅見法意已決必可就範法不願滅暹亦不廢其自主之權祇要所請五事允許卽

可講和。慶云：瀾滄江上游兩岸皆歸中國管轄。貴國何以有割江爲界之說？德云：法不欲佔中國屬地。但上游必須分清界限以杜爭端。此事最易商辦。又云：法暹之事若非英國播弄早已和平了結。英非有愛於暹乃欲激成兵端從中取利也。卽如法越之釁亦英挑唆。英果真愛中國何至乘機吞并緬甸乎？上年英割暹羅北境沃壤千餘里而以其餘作英法之臨脫。故法不得不收江左之地以應之耳。

十一日記

法國勒當報云：西貢接施敦倫

地在湄江

電：法兵官微拉

於初七日清晨在康島向暹羅開礮。當日得到三礮臺。一唐杜。一唐哥。一唐漢。進圍唐沙礮臺。此臺雖有精營三座保護。初九日亦爲法得。暹兵死者三百。傷者三百。法兵一無損傷。康城及羣島皆爲法兵所據矣。

十二日記

數十年來俄國不能肆其西封。遂欲改而東略。其佔日本之庫頁也。甘以科爾十八島與之相易。置爲東方邊郡。其佔黑龍江地也。亞古斯科義爾古斯科貝加爾右與外興安嶺相接。咸隸於西伯利亞。當時中俄之界相距尙遙。自納喀逆阿古柏之獻地。駸駸乎至貝加爾河。

之南矣。顧意猶未饜。乘回逆之亂。漸拓而南。今又與朝鮮接壤。幸黑龍江以南。陸路山嶺叢雜。調兵運餉。跋涉維艱。乃俄人又築鐵路。志在必成。聞俄官謂英教士曰。二十年中。俄之鐵路。必直達華疆。其志可知矣。俄有黨禍。由來已久。自彼得羅從英荷學藝而歸。乃有守舊維新二黨。至今守舊黨已銷聲滅迹。維新黨則通國皆然。卽所謂希利尼黨也。彼因俄爲君主之國。小民無自主之權。故欲如法美西比之民。之得以自由。常思乘間一逞。改君主爲民主耳。

十三日記

許竹簣來書云五月十六日得署電稱疆撫肅電俄馬
步約七八百至六爾阿烏。即穆爾格阿布常向俄外部詰問則
以換班對以後未有他耗而外部頗以我進兵爲言。原
塔什庫爾干之旋接署電現電疆撫勿再進。兵春李實稍進彼意亦解
大約今夏可以無憂惟議界一節自二月指明地名告
喀使後外部謂我仍照喀約指地殊無可商總署令探
詢彼意若何彼以嘎爾斯初歸須漸料理迨後以我兵
進紮謝不肯商日前與基斯敬晤面則云已由兵部詢
查塔什干總督俟得覆再商等語又似意在延宕署中
來函有將實非所重之地稍與變通大約在隨事操縱

不能預有成竹。去秋駐俄英使。得其外部兩館互相關照之囑。彼此尙不隔膜。今年俄暫停兵。實賴有英牽掣。萬一英俄所商有緒。則中國勢孤。彼益無忌矣。

十四日記

有一出使隨員論西國富強之原。登之報章云。西國制治之要。約有五大端。一曰通民氣。用鄉舉里選。以設上下議院。遇事昌言無忌。凡不便於民者。必設法以更張之。實查戶版。生死婚嫁。靡弗詳記。無一夫不得其所。則上下之情通矣。二曰保民生。凡人身家田產器用財賄。絕無意外之虞。告退官員。贈以半俸。老病弁兵。養之終

身老幼廢疾陣亡子息皆設局教育之則居官無貪墨
臨陣無畏縮矣三曰牖民衷年甫孩提教以認字稍長
教以文義量其材質分習算繪氣化各學或專一事一
藝終身無一廢學者何也有新報之流傳社會之宣講
也四曰養民恥西國無殘忍之刑罪止於絞及遠戍苦
工其餘監禁罰鍰而已監獄清潔無比又教以誦讀課
以工藝濟以醫藥無拘攣無鞭撻而人皆知畏刑不敢
犯法幾於道不拾遺父母不怒責其子家主不呵叱其
僕雍然秩然男女雜坐談笑而不及淫亂皆養恥之效
也五曰阜民財其藏富於民者三要一盡地力謂講水

利種植氣化之學。二盡人力。各擅專門。通工易事。濟以機器。時省工倍。三盡財力。有公司及銀號。而錙銖之積。均得入股生息。彙成大工大賈。有鈔票及金銀錢。以便轉運。則一可抵十矣。有此五端。知西國所以坐致富強者。全在養民教民上用功。而世之侈談西法者。僅曰精製造。利軍火。廣船械。抑末矣。

十五日記

黑龍江漠河金礦。光緒十七年第三屆帳略云。漠乾兩廠共得金沙愛平二萬五百九十五兩。因乾北金色較低。其售愛平銀二十八萬一千六百餘兩。另收價利雜

餘兩項六萬二千一百餘兩。除付礦丁六成金價並股票官利及各廠局營一切開銷。尙應餘銀八萬一百餘兩。提作保險公積銀三萬一百餘兩。尙餘五萬兩。照章作二十成均分。黑龍江軍餉六成。應分一萬五千兩。員司花紅四成。應分一萬兩。各股友餘利十成。應分二萬五千兩。查前售股票四百二十五張。又佳水公記借款暫改股票七百張。共一千一百二十五股。每股應分銀二十二兩。其二萬四千七百五十兩。尙餘二百五十兩。歸入上二屆餘款內。此次結出餘利。以礦丁虧款過鉅。糧貨攔本又多。仍無現銀可付。且佳水公記存款暫作

股票究係公款茲已陸續清還收回股票銷廢惟公司股本未足極難周轉如查有股票五張應分餘利一百十兩卽填給股票一張息摺一扣另找現銀十兩下次再有餘利卽當找發現銀不再抵付股票漠河礦務公司袁大化啟

十六日記

李筱帥查覆張蕓帥被參摺云在粵五年罰繳之銀約七八十萬兩已造報未造報者皆有冊案可憑無非取之關蠹吏贅博徒標匪以及貪劣各員董而非抑勒乎富家用之以充餉濟賑利農恤士以及營造各要工並

非銷於無益。黃江稅廠潮橋鹽務皆掃除。更張拔其病。本取中飽糜費之款而歸之公。豈得謂虛糜帑項。該前督臣任內用款均已造報實用實銷。並無浮冒。所建廣雅書院書局。或自捐資。或用罰款。並非動用正項。劉峴帥覆奏摺云。張之洞創辦鍊鐵。並開煤鐵各礦。一切事宜均隸於鐵政總局。原估經費二百萬兩。續請七十萬兩。以爲開礦鍊鐵之需。所購外洋機器已運到八九成。各廠房屋亦已興築過半。有鍊生鐵熟鐵者。有鍊精鋼粗鋼者。現正接續興造。安設機器。規模闊大。需費浩繁。大冶鐵礦開采業已見鐵。煤礦則江乙馬鞍山大冶。

之王三石兩處。片段較厚。煤質較佳。王三石所採之煤。已陸續運廠。用項因撥款一時緩難濟急。暫爲墊應。事或有之。所謂搜索者。殆卽指此。

十七日記

元至正六年。

西一千三百四十六年

法蘭西始用礮於陸路。又四

年。始用礮於水師。自是海戰以轟破敵舟爲勝。無復短兵相接矣。我

朝道光元年。

西一千八百二十一年

概用十八磅彈之礮。嫌其太

小。至道光三十年。概用喀倫礮三十二磅彈。自是逐漸改大。船礮愈重愈得力。如法皇拿破侖之來復礮。克滑

禮來復礮。來克斯德來復礮。策度滑來復礮。愛墨斯德
倫來復礮。以及比利時藕心礮。格托林連環礮。普國克
鹿卜礮。皆無遠不中。無堅不摧。在製之得其法。尤在用
之得其人。用礮之法。在詳審定準。凡用礮者。先向左右
磨。令礮恰對所擊之物。然後升降其礮口。以定之。升降
時。仍合物之垂線。謂之割面。然必兩耳與地平合。毫無
偏倚。可使割面與垂線恰合。望準者。於礮之前段隆起
令與尾籊半徑同高。不用礮面線。而用礮軸平得之線
也。舊時用木板於礮口之上。作望準。繼用鐵釘。有法國
人改用短柱。上劃尺寸。內面橫條。可升降而表尺不動。

表尺最高與橫條最低參直爲度數。最遠約三千三百尺。或三千九百尺。表尺最高與橫條最高參直。卽礮軸平行之線。審此定準。自能命中。百不失一矣。

十八日記

用礮之法。又宜慎防誤炸。凡敵船發礮時。如有實彈墮於開花彈之艙中。則船必炸沈。故儲彈之艙。須在中間近底處。否則恐船側時仍被實彈擊中。凡遇敵時。不可將開花彈豫置艙面。凡移動開花彈。須加意謹慎。勿稍疎忽。至於本船發礮。開花彈或在礮管。或初出礮。卽炸。則因藥力太猛。驟增熱度所致。凡裝開花彈炸藥。須用

油布擦淨。用漏斗鑲入引門。納以炸藥。不可稍有藥粒黏於引門。庶免誤炸之患。又發礮時。有迎風背風之別。如敵船在上風。用迎風一邊之礮擊之。其擺動漸高時。正船在浪窩時。斯時不宜發礮。其船在下風擺動較速者。一因順風。一因背風面之浪甚陡。其船向上風擺動較遲者。一因風阻。一因迎風面之浪斜坦。故須俟迎風之船旁高定而將復低之時放礮。則船在浪頂。恰能望見敵船。發無不中矣。如敵船在下風。用背風一邊之礮擊之。其船在浪窩時。不宜發礮。其向下風擺高較速。故須俟背風之船旁低定而將復高之時放礮。則亦船在

浪頂恰見敵船。發無不中矣。其餘如躍起越擊。擊焚帆檣。權宜發礮之法甚多。要在因時制宜。用得其人耳。

十九日記

昨日曼谷電云。暹羅於十七日照會法使。願悉依法人所索各款。並允盡割湄江以東。越南柬埔寨之舊地。近屬於暹者。歸法管轄。英法當卽日會議界務矣。因越南緬甸南掌各邊。必有接界之處也。又星姆辣在印度督避暑山上電云。有一要事關係中國利益。此間甚爲留意。潞江瀾滄江中間野番。有欲歸中國之勢。因中國無意經理此等野番。緬甸英官屬北揮人國之總管。相機收

爲英屬。俄電云。中亞細亞巨商甚願將撒馬爾罕之鐵路接長。議自撒馬爾罕至塔什干另分一枝。通至浩罕。安集延等處。僅鐵路告成。於裝運棉花等貨爲有益。法政府告議院以不攻曼谷之故。據云曼谷居民三十五萬。大半客籍。毒城之際。或激成內變。有添兵添餉之難。一也。既已傷人。他國可藉口保護商民。從中攪擾。二也。城破之後。或礙暹羅自主之權。英國必出而干預。三也。

二十日記

上海製造局仿英國阿模士莊廠製成新式八百磅子

之後膛大礮一尊四十磅子之全鋼快礮一尊已在局
南隙地演試中西觀者嘖嘖稱歎按阿模士莊廠總辦
槐特之論曰克鹿卜之後膛礮關門處用梢子一法不
合用料之理而且礮尾必至加長礮後必佔地位在岸
用尙可將就在船用最有關礙阿廠後膛礮之裝法用
中心螺塞不佔礮後地段亦能保護礮手克鹿卜礮之
好處在創有鋼管鋼箍之法近阿廠亦改用之又查歐
洲巨礮無過一百二十邁當滬廠新製大礮當在三十
餘磅之列用於守口礮臺最爲合宜其八百磅子有尖
頭平頭炸彈羣子之分所用藥爲栗色火藥至於四十

出使日記
磅全鋼快礮之製取法尤新。用於行營爲最宜。不逾半秒鐘。可連放六出。所用之藥爲無煙火藥。妙處更不可思議。勝於數年前所出之哈乞開士連珠快礮矣。

二十一日記

昨日英外部大臣勞俾伯里在上議院告沙侯曰。暹羅

兩次答允法國兩種戰書。第一次戰書

哀的美敦書

係西八

月二十九日

即中六月十七日

所允第二次戰書。即第一次戰

書之補編。今日下午始知暹羅均已答應。明日即撤去

封口矣。第一戰書一認堪波提及越南有統轄湄江名一

湄公江左岸及各島之權。二限一月內所有湄江左岸暹

羅兵寨全行退出。三暹羅侵陵在閩南姆江之法船並
水手及寓暹法民須愜意賠禮。四賠銀給受害者之家
眷並懲辦罪人。五各種受虧之法民應賠補法銀二百
萬佛郎。六擔保照行第四第五條所開之事。暹羅立即
出銀三百萬佛郎。如不能出銀。即將先利潑。一譯作錫
模立曉及班德本。一譯作拔
得模朋兩處歸法收稅。以作抵押。第二戰
書。一法國佔踞車德蓬江及湛地門海口。至暹羅兵退
出湄江左岸。然後讓還。二從東埔寨邊界起。距湄江二
萬五千法尺之內。合十六
英里不准暹兵入其地。派巡捕保
護地方則
可。三暹羅兵船不得入大湖。四法國有設立領事於孟

出使日記續刻

卷八

七
傳經樓校本

范

一譯作
模溫

及哥拉脫之權

二十二日記

俄前皇亞力山德第二之被弑也。在光緒七年前皇在俄京閱兵後乘馬車回宮。行至中途一婦人身穿黑服立於加新橋樑。既見皇車。即以白巾三覆其面。有裝束似鄉愚者數人。早已會意。疾趨運河旁以待之。未幾皇車至。左右列兵護衛。人有舉帽及高聲喝采以示敬者。人語喧闐之際。猝聞轟炸聲。如重物下壓。皇車後煙燄上騰。木石交飛。護兵多有受傷者。馬驚而止。御者回顧。皇似無恙。車亦完好。方欲向前馳騁。皇止之。且啟門以

出則見皇血糊兩手。面如死灰。皇既下車。各官趨前叩
安。且問傷否。皇搖手低聲。指傷而言曰。此非傷口乎。俄
而差官拘一人至曰。兇手已獲。請治之。皇顧而問曰。汝
卽兇手乎。對曰然。問其名。則以僞名對。其眞名實李沙
哥輔也。又有兵官進叩傷狀。皇曰。獲天之祐。未見損傷。
兇手微言曰。未當歡喜。少頃便知。皇固未之聞也。乃沿
運河以行。忽有人從人叢中擲一物於皇之旁。其形如
雪。砒然而炸。聲若巨雷。眾見皇與該匪俱倒於黑烟之
中。身傷肢裂。血漬模糊。慘不忍睹。是時雪霜滿地。血染
成紅。狀如紅海。皇呻吟呼痛。皇弟趨前問信。皇言斷續。

不相接。口稱寒冷。命速昇至暖宮。以備後事。各官以大
衣裹之。置暖車中。驅回暖宮。官民趨宮外。問音耗者不
止萬人。世子與諸大臣倉皇奔至。須臾見宮外所懸旗
忽下半截。眾知皇崩矣。皆去帽跪地以弔。并爲皇祈禱。
新皇亞力山德第三卽位。

二十三日記

殷之輅策云。槍礮取準。法至不一。而礮準尤難。然不外
無定法。有定法二者而已。何謂無定法。天時有寒暑燥
溼。則空氣疎密不同。阻力因之而異。風勢有順逆偏側。
則彈行助退相反。能力因之而大異。地段有水陸高下。

則地力與空氣兼有輕重厚薄之殊皆足以改變彈路致生諸差而各礮本差尙不在此列是在熟習審知運以精心庶幾變化無方鮮有不準矣所謂無定法非言可宣者也何謂有定法蓋卽彈路所成之拋物綫可以算術得其高低遠近之數夫彈之所以必循拋物綫者係合三種力所成爲勢所必然重學理非可強也一爲彈行本重速力一爲地心吸引力一爲空氣阻力合而較之而拋物綫之理得矣拋物綫之理得則彈所能及之道里丈尺不難推算而知所謂有定法其數可測者也

二十四日記

試卽二十四生特之礮。求其平擊與上下斜擊之數。按生特乃法國度衡取數之名。二十四生特之礮。略等於英國三寸徑而用六磅彈之礮也。此礮始速率約一千零五十尺。五千步之末速率約六百三十尺。則其平速率約得八百四十尺。凡礮愈遠則平速愈減。愈近則平速愈增。若在一尺內。則平速所差無幾。卽始速也。假如平置一礮。高於地平十六尺以下。彈可及一千零五十尺。高於地平三十六尺以上。彈可及一千五百七十四尺。卽高至九百尺。亦可平擊敵船。然彈力至此已減。若

更及遠則無濟矣。惟山麓守口礮臺能有如許之高。可以平擊敵船。若海面兵船相交。或平地兩軍相對。此礮平擊。須在半里之內。方克有濟。欲擊更遠。則斜向上擊之。昂度不可不知。若敵船已近。或敵已登岸。而臺上平置之礮。高不可及。則斜向下擊之。低度亦不可不知。欲知低度。必先明昂度。凡礮昂高四十五度。則彈及爲最遠。如敵已迫近在一里之內。宜將礮尾高墊。俾口低下若干度。乘勢斜擊。方能命中。至於避彼上擊而仍不礙我下擊。則亦惟洞明順逆。善測遠近。俾礮無空發而已。

二十五日記

德國之秤曰鐵勒葛攀。每一鐵勒葛攀約重二磅二分五。擔曰色納。約重一百十磅。尺曰米特。每一米特約三十九尺三分七厘。曰結羅米特。每一結羅米特合英里八分之五。又曰買耳。每一買耳合英里四里零三千一百六十五尺。法國量物之器曰噸。每一噸重二千二百磅。尺曰米特。每一米特合華尺三尺一寸。十倍之曰特喀米特。百倍之曰合得米特。千倍之曰結羅米特。里曰阿爾。計三畝零八分。四十倍之曰合搭兒。減十倍曰生搭爾。秤曰喀羅格郎。每一喀羅格郎合二磅二分五百倍之。稍弱曰浸篤。俄國量木之尺曰藍納斯。每一藍納

斯合英尺一百零三尺。其他量物。則以英尺爲準。里曰
阜斯得。約英里半里強。秤曰波特。每一波特合四十磅。
奧國秤曰勝得南。每一勝得南重一百二十三磅五量
地曰約。每一約合英地一畝四分三尺。曰扣拉夫德。卽
立方。每一扣拉夫德合英尺六十七尺。丹國秤曰磅。每
一磅合英國千分磅之一百零二分。尺曰福得。每一福
得合英尺一尺又百分尺之三。意國之里曰結羅美特。
每一結羅美特。分一千零九十三模。每模合英尺三尺。
比國秤曰結羅格蘭。每一結羅格蘭合英國二磅零二
十分。量地之器曰吞拿。每一吞拿約二千二百磅。里曰

結羅米特。每一結羅米特。合華里一里半強。尺曰米特。
每一米特。合英尺三尺零零二分。土國秤曰瓦格。每一
瓦格。合英磅八三零二六。合四十四。瓦格曰進得。一百
八十瓦格曰吃格。尺曰杭達實。每一杭達實。合英尺二
尺七寸。斗曰格羅。每一格羅。合英斗九分一二。其餘諸
小邦不及稽攷。至於巴西。西班牙。葡萄牙。荷蘭。瑞典。腦
威。瑞士等國。與法相同。美及印度。與英相同。英製爲質
易者所共知。可無煩贅述也。

二十六日記

叻報云。西人多借日食以精測驗。梁大同二年。唐武德

九年至貞觀元年。明嘉靖二十六年。日光大減。皆因日面有黑斑爲之掩也。日面斑多。其年地球熱度大。而五穀豐。日面斑少。其年熱度小。而五穀歉。太陽光體之外。必有最清之氣包之。日爲月掩則食。道光二十二年日食。天文士以遠鏡窺之。見月體外發光。或云如火燄。或云如山。咸豐元年日食。既玫瑰色峰。自日面發出。光體之外皆有雲狀。太陽光包四圍必有空氣。其光成爲條縷。有若光球內之大浪。同治七年日食。既甚久。測望之士皆見日邊有發出之峰。及四周光帶。因以照相最精之器照得之。太陽中亦有雲。與地球之雲相似。其形狀

若羊毛棉花此爲太陽格致之創聞非由日食則不能測得也日體必最熱恐亦猛火或光熱在外中間隔以雲氣令外之熱不得入則日非熱體轉爲冷體亦未可知總之日以光熱化生萬彙風雷雨露飛潛動植川澤消長河海流行皆日氣所爲也日之功用大矣哉

二十七日記

余於二十二日電致總署云法務巡羅割瀾滄江東岸地與滇接壤外部屢催分界應電滇督勘查非可猝議外部告虞常願不稍侵滇屬土司彼因遲事未了措詞和順宜仿英廷辦法由使臣請外部依言寫立憑據如

此雖一兩年後議界無妨。若遇事大定。彼必妄生覬覦。或致棘手。立據一節。擬請先告李梅。再令慶常試辦。萬一未能辦到。應由督與李梅早議。以弭後患。昨接總署來電云。李梅論暹事。總謂仍歸於和。湄江東歸法。法必不佔暹地。請我擬界。所擬界綫在緯綫二十三度零。觀將車里全境佔去。已駭其誤。仍電滇督確查。來電欲外部立憑據。恐辦不到。聞車里部內有貢於緬暹者。彼卽立據。後仍有詞。未爲善策。總之英以車里歸我。正其狡計。此事不能緩至三年後再議。希設法探訪車里貢暹之士司。能得詳圖尤妙。余隨發電云。車里屏蔽滇南。關

係形勝。李梅朦混。駁之甚當。查車里有四城。在湄江西。入城在湄江東。法所覲者。東入城也。法印地圖。將東入城繪入法界。慶常詰之。外部自認錯誤。英以車里歸我。明知狡計。然會典及一統輿圖。並滇督來圖。皆隸滇境。斷難一旦棄之。還尙自主。土司貢暹。與法無涉。今日余又發電云。細思李梅意甚狡。外部立據。不過聲明車里所屬十二城。在法國權利之外。雖難辦到。請姑試之。順則旬月必成。日後免大爭論。不成則知法謀不善。可出署速與李梅議界。

二十八日記

大金沙江東岸四城之地曰邁格納曰允帽曰戛鳩曰
泰洛崖戛鳩係中國揮人塔姚克司所造允帽係戛鳩
人所開那塔羅係允帽人所開在米紀納之南泰洛崖
係那塔羅人所開邁格納係道光八年米紀納人所造
有一總管四城之人名來姆姚克或云蠻暮土司所派
李仙江卽黑江上游今中國與國以瀾滄江下流爲
黑江誤矣漢龍關在瑞麗江及南碗河彙流處相近
天馬關在此西北相距六七英里猛卯孟密兩土司
互爭邊界後議定南坎江流入瑞麗江處距瑞麗江與
南碗河彙流處三英里半爲邊界

二十九日記

叻報客有談邊防者。茲摘其大略云。黑龍江眞塞外天
塹也。其源出自西域。不入中原。經行邊界。東入於海。盤
旋曲折。劈分南北。界乎中央。江之北爲俄地。崇巒疊嶺。
人迹罕至。荒山曠土。不知幾千萬里。江之南山川秀發。
林木蔥蔚。棟樑之材。取之不竭。五金礦產。綦布星羅。沿
江居民。或耕或漁。亦魚米之鄉也。惜開墾成田者。不及
十之二耳。乾隆初年。劃江爲界。沿江設卡倫。置台站。黑
龍江形勝。我獨踞之。厥後俄人竊踞江之出海口岸。今
稱之爲尼格蘭斯。於是俄界渡江而南。自烏子江。烏蘇

里以下，南北兩岸數千里，盡爲俄有。雖烏子江上游，界限嶄然，俄人未敢侵越。然江中險要，我已與俄共之。俄自踞尼格蘭斯，經營商務，因海輪不能行江，乃創造小輪船公司，以資轉輸。西人旅居者，各國咸集，而德人尤多。自尼格蘭斯迄於紅土窪，沿江而北，直至俄之金沙廠爲止。金廠大者四座，分設尤眾，出金之盛，勝於我南岸。漠河金礦，數十倍。彼又過江而南，迫令土酋剪髮易服，均隸俄籍。其地多貂皮、鹿茸、麝香、東珠、人參等貴重之物，且土脈衍沃，宜乎耕植，乃設兵屯墾其中。其地日見殷富矣。

三十日記

俄人用計易我琿春地四百里。兵舶商輪。得出入溟海。以海參崴爲進泊之所。開成一通商大埠。招募朝鮮土民爲兵。合本國戍卒不下十萬。破臺大者十餘座。小者不可枚舉。緣山環列。水程自海參崴而進。九十餘里至原溪河。剡木爲舟。可容千百石貨。爲羣商必經之處。亦有重兵屯守。陸行三百里抵琿春。有卡倫焉。距我琿春土城祇二三十里。備兵房。置邏卒。嚴查商貨。以收重稅。琿春西與朝鮮接壤。有甌脫焉。中國不遑顧問。爲朝鮮人越界偷墾。漸成村落。今又爲俄所占。開通站道。土民

供其田賦任其役使俄人通行數十里車轍馬跡可直抵黑龍江邊一無所阻至我之瑋春木爲三姓甯古塔黑龍江之門戶今乃孤城獨立首當其衝內地山深箐密絕壑懸崖道路崎嶇官商往來者反借俄之臺站爲行役設有梗阻徵兵運餉豈不艱難昔年吳大澂察閱形勢居高向陽加築土城更緣山堅造礮臺又撥兵屯壘其地曾幾何時而規模漸廢矣

七月辛巳朔記

黑龍江土著之人以打獵爲生童而習之槍不虛發然所習者烏槍也承平日久不習戰陣膽怯無勇用以捕

盜尙不足恃。故恆檄調馬隊焉。練軍卽曰可恃。未必足
敷調遣。況北地早寒。八月卽雪。江水不流。層冰堅互。居
民制器。名曰排犁。製同車式。而下無輪軸。上圍毳幕。身
卧其中。擁重裘。裹餼糧。駕馬前驅。其勢甚溜。瞬息千里。
反利於平時之遲滯。秋冬之交。江流旣失其險。已與敵
其之矣。黑龍江水清濁不一。深淺懸殊。松花江間有淤
淺處。自宜設法淘深。更宜自造行江輪船。以利水師。今
中國未有江輪。故漠河金礦。仍僱用俄船。以烏子江下
游爲俄界。至中國旗幟。不得懸挂。誠非久計。曷若自造
自行。以權其利哉。廣西自咸豐八年在桂林平樂梧

柳潯鬱慶遠南甯泗城百色等府廳州各要口設卡抽收貨釐鹽釐。光緒十八年其收正釐銀五十八萬五千餘兩。公費銀四萬六千餘兩。

初七日記

俄人族種分而爲三。曰大俄。曰小俄。曰白俄。各爲種類。不相統攝。俄京彼德羅堡。自貴官巨族外。皆爲德商所居。市中銀貨漲落及貨物貴賤。德商皆操其柄。去年中日兩國貿易。日貨運華。值銀六百三十餘萬兩。比之上年。祇增銀五十餘萬。華貨運日。值銀一千二百餘萬兩。比之前年。殆增四百餘萬兩。華貨銷於日本者。以棉

花豆類及油槽草席赤糖爲大宗近年頗能獲利

初八日記

日本有腰房礮之鐵甲船一曰扶桑艦甲厚九寸至八寸置二十四生特礮四尊十七生特礮二尊水綫帶鐵甲船四曰比叡艦甲厚四寸四分曰金剛艦甲厚四寸四分曰龍驤艦甲厚六寸蓋購英國舊船而修整者曰東艦甲厚四寸四分至三寸二分巡海快船十有六曰筑波艦曰淺間艦曰富士山艦曰海門艦曰天竜艦曰筑紫艦曰高千穗艦曰浪速艦曰畝旁艦曰日進艦曰天城艦曰磐城艦曰清輝艦曰春日艦曰蒼龍艦曰迅

鯨艦此外尙有礮船六號曰第一丁卯艦曰第二丁卯艦曰鳳翔艦曰孟春艦曰千代形艦又一艦尙未知名水雷船大者一號兩旁鋼板厚一寸小者六號未及記其名也

初九日記

前表日本各船之外又有雷電艦爲五等常備船成於道光三十年龍驤艦爲三等鐵甲船成於同治四年石川丸爲七等練習船成於光緒三年葛城艦爲三等鐵骨木皮船成於光緒三年大和艦爲三等鐵骨木皮船成於光緒元年武藏艦未詳高雄艦未詳摩耶艦爲不

列等之鐵船。愛宕艦未詳。島海艦成於光緒十一年。赤城艦亦爲不列等之鐵船。又有千島艦。甫從英國製成。卽磕碰而沒。未列於冊。此日本兵船細數也。日本有海軍提督署二。一在靜岡相模國三浦郡。一在鹿耳島耶摩國鹿耳島郡。

初十日記

俄跨歐亞兩洲之北境。長約二萬餘里。其歐洲諸國瑞典那威約一千餘里。丹國約千里。奧國東西三千一百餘里。南北一千八百餘里。德國兼普魯士及日耳曼列國南北一千一百餘里。東西二千一百餘里。瑞士不過

東西五六百里。南北三四百里。土耳其國縱橫約四五千里。希臘約縱五百里。橫七百五十里。意大利國縱橫約不過千里。荷蘭縱橫皆不及七百里。比利時國縱橫皆不及六百里。法蘭西縱約二千二百五十里。廣約二千六十里。西班牙國西南至東北二千四百五十里。東南至西北二千八十里。葡萄牙國縱約一千三百里。橫約五百里。英倫蘇格蘭兩島南北約二千餘里。東西闊處五六百里。狹處三四百里。迤西阿爾蘭一島南北七八百里。東西五六百里。至若阿非利加一洲。南北一萬八千里。東西闊處一萬六千里。亞美利加一洲。長二萬

八千餘里。

十二日記

開教之案自同治以來一見於河南鹿邑再見於桐柏三見於武安四見於直隸永年五見於揚州六見於四川西陽七見於天津八見於黔江九見於瓊山十見於龍川十一見於九江十二見於溫州十三見於皖南十四見於海豐十五見於清遠然未有如前年蕪湖武穴無錫丹陽江陰之教案迭起數千里之地響應於一兩月之內者也。

十三日記

近時法國辦理海軍試驗以鴿傳信之法先以數鴿交一兵輪駛至海外約去口岸五六百里放之空中倏忽不見回岸詢之飛歸甚速論者謂練之得法必有大益西國因設專官以司之普法之戰法京被圍乃以鴿傳信用輕氣球六十四具凌升空際以出法京攜鴿三百六十隻放之有三百二隻飛回巴黎第二次一百餘隻飛回九十八隻帶有官文十五萬件民信一百萬張其字用照相法縮之極小必用顯微鏡方能辨認由是法人設局育鴿操練屬之兵部并立專律管理其事國家育鴿十萬隻民間立會育鴿者十處每處育鴿七百二

十隻。德國亦派員專理此事。柏林有二局。每局育鴿五百隻。能飛至一百二十英里外者。旌以金牌。每年育鴿費約銀一萬兩。又有民鴿會七十八處。意國亦有武備鴿房總局。外有分局十處。此外陸軍養鴿者亦復不少。西人化無用爲有用如此。又有用蜜蜂傳信一法。每一點鐘可行二十里。然遠至三十里以外。則多不能飛回。終不若鴿之能遠翔。且多帶信件也。

二十一日記

粵垣大北門外三三元里。永安火藥局於五月十一日申刻。因廚房失慎。焚燬藥房四間。附近之瑤台沙涌等鄉。

塌倒房屋。灼壓斃命者。不計其數。儲藥之所。雖環以水溝。潦以高牆。亦竟無益。溯查道光之季。上海老北門內九畝地火藥局被災。焚燬火藥數十萬斤。傷斃數十人。震倒房屋甚多。又咸豐九年秋。山東火藥局失事。震陷十餘里。死傷姓名可查者四千餘人。無可查者不知凡幾。巡撫上聞。奉

旨賑卹。同治六年十月二十六日正午。湖北省城山前大校場火藥局被災。忽然電掣雷轟。牆傾壁倒。閱一時許稍定。中初復然。蓋城中有二局。雖相去數里。阻隔一湖。而聲氣相感。致此局甫畢。彼局又震也。並有子母礮

二尊一經燃及循環不已致塌民房數千間斃命數千

口局員十餘工役數百局牛三百餘頭皆碾火藥者至是查

然後挑瓦礫乃得殘骨堆積如山是役焚去硝磺數千

萬斤震陷平地百餘丈重淵巨浸毘連而七淺者丈餘

深者五六丈黃岡陽邏皆在江北距省六十里當時亦

覺地震光緒庚寅九月二十一日太平府火藥局災前

已誌之不復贅述大抵火藥係硝磺二物製成硝爲陰

精磺爲陽精陰陽相薄故必常見風日以洩其性否則

火從內出不燃自焚理固然也又查光緒十年十一月

十三日辰刻佛山鎮火藥局失慎斃工匠百九十名焚

去火藥數百萬斤。轟聲震動省城。其局爲龔方伯易圖所開。因其庇護失慎之局員。致列彈章。三元里火藥局焚燬。現經廣東司道會同營將赴城外東北隅數里外之劉澤園。勘得一地。俗名大片田。田畝寬廣。故以爲名。以建藥局。極爲相宜。此地距城不遠。村落甚遙。前歲松江紳士稟請將火藥局移建城外曠地。卒以經費無出而罷。

二十四日記

自美國佛勒爾勒釐邦與墨西哥瑤克坦省之間。環南美洲委內瑞辣之亞林挈可江口。有西印度羣島者。島

形長曲。大小高下不一。西人分爲三大羣島。一曰大安的列斯羣島。二曰巴哈麻羣島。三曰小安的列斯羣島。大安的列斯中。有島曰古巴。曰海地。曰波爾多黎各。曰牙買加。皆大島也。巴哈麻則爲珊瑚低平羣島。在四大島之東北。大西洋之中。小安的列斯則皆火山之迹。在大安的列斯之東。更近南美洲洋岸。島多風災。亦多苦雨與熱病。統計西印度羣島之地。約九萬五千英方里。而大安的列斯約得八萬。民約三百五十萬。或云四百五十萬。分三類。一阿洲黑人。一歐洲白人。一歐洲人與黑人所生之人。黑人居四之三。羣島中除海地自主外。

若古巴。若波爾多黎各。則屬西班牙。若巴哈麻。若牙買加。及小安的列斯中之大半。皆屬英國。小安的列斯中。若聖召恆。若聖召滿斯。若散貧克羅士。皆屬丹國。若聖排召老慕。若乖達鹿破。若馬耳的尼加。悉屬法國。此外屬荷蘭者。祇有古辣。可與附近二島。近委內瑞辣聖排召老慕之西北。有聖麻丁小島。半屬法國。半屬荷蘭云。

二十五日記

海地全島。介於古巴與波爾多黎各之間。有樹林之山。島也。東西長四百英里。約三萬英方里。在西印度羣島中。肥沃稱最。氣候宜人。有金銀銅鐵錫各礦。戶口約七

出使日記續刻

卷八

三 傳經樓校本

十萬黑奴過半土產紅木染料木加非可可棉花煙葉蠟薑糖海澳便於泊船通商便利惜多變故商務大壞先是全島屬西班牙一千六百九十七年島以西始割歸法國一千八百年間島西人又脫法羈絆自立爲民主國卽今所稱之海地也其地有九千二百三十二英方里戶口五十七萬都會曰拋多潑林司一千八百四十四年島東人亦自立爲民主國曰山度明哥今海地全島蓋有二民主國云山度明哥之地雖倍於海地國然戶口不及海地四之一大海口與國同名都會亦然

二十六日記

光緒九年張靖達在粵督任內電致李丹崖星使定購魚雷雷艇相度虎門沙路魚珠各要口形勢訂購守口之沈浮水雷電纜等項延訂洋師在黃埔設局考取學生選募水勇認真練習查魚雷之用可以轟敵船可以作埋伏而安放運用亦不甚易粵省魚雷雷艇皆爲重價購得式類繁多皆係鋼料不可輕視北洋本有旱澳船臺魚雷廠屋分別安放章程井井粵省亦應妥籌收藏之地勿令珍物常浸水中致多損壞雖常油飾究難持久前因廠澳工程浩大未能因時建造繼議在黃埔設廠買田填築蓋造旱澳船臺一區內分爲二一日正

臺。一日副臺。正臺用鐵路四條。可安置雷艇九艘。尙餘二艘。輪流停泊水面。以備操演。副臺用鐵路兩條。以備抽換操演時前後騰挪安置艇架之用。四旁餘地。分建住屋。並存儲船板艇臺料件等屋共七所。又建魚雷廠屋一所。廠前臨江。建橋一座。人字架一副。俾魚雷水雷均可在此起落。

二十七日記

歐洲地約三京五兆五億五萬方里。每十方里計一百零一人。共得三垓六京零二億人。亞洲地約一垓四京七兆一億方里。每十方里計五十七人。共得八垓五京

丁口。阿洲地約一垓一京五兆一億四萬方里。每十方里計十一人。共得一垓二京七兆人。澳洲並太平洋羣島之地。約三京三兆方里。每十方里計不足一口半。共得四兆七億五萬人。北美洲中美洲地約六京四兆四億六萬方里。每十方里不足一丁口半。共得八京九兆二億五萬丁口。南美洲地約六京八兆三億七萬方里。每十方里計有五人。共得三京六兆四億二萬人。北極五穀不生之地。約四京八兆八億八萬七千方里。僅得三億丁口。合五洲全地計其五垓一京二兆五億零八千方里。其人計十四垓六京七兆九億二萬口。肌膚之

色皆緣水土之殊。比類參稽。可分爲六。大抵黃色人族約六垓。二京五兆有奇。白色人族約五垓。七京有奇。黑色人族約二垓。一京五兆有奇。半黃半白色人族約六京五兆有奇。淡黑色人族約三京三兆有奇。雜色人族約一京五兆有奇。以上雖分六族。而歷代以來。婚媾相通。彼此互爲夫婦。有難過爲分別者。總之。今之著名族類。一黃一白耳。黃人管轄五洲之東方。約占五洲十分之三。白人轄歐美澳洲及亞洲之西壤。約占十分之八九。此其大較也。

二十八日記

余挈眷避暑於白雷登。繙譯王豐鎬武弁王鐸皆從。中國西藏突厥蒙古東三省及黑龍江以北地。朝鮮日本越南暹羅緬甸諸國皆黃色人族也。論黃人之文學。中國實肇其端。亦獨臻其盛。武功則應讓蒙古。首屈一指。如元太祖之以次臣服中國。印度俄羅斯何其偉歟。白色人族又名雅理翰族。蓋因上古之世。崑崙山有雅里翰一種人。其苗裔南至印度者。膚色白於印度人。故兼以白人名。既而西行至歐美二洲。紛紛占籍。其髮有黑色黃色之別。成周之世。白人文學著名者。推印度波斯。戰國以迄秦漢。以希臘羅馬爲文人淵藪。近則白人

文學。徧於歐美二洲矣。黑色人族。其居處皆在赤道之下。天時炎熱。蓋阿洲族類也。東以太平洋爲界。西以中美洲爲界。黑人一族。從古無著名之國。近百年來始有人教之讀書識字。或被他國虜以爲奴。迄今未能盡絕也。半黃半白色人族。如古時印度西北之巴庇倫及蘇利耶埃及諸國。溯夏商周之世。此族人之名望。四遠咸知。各洲政教之出其右者。惟中國耳。淡黑色人族。卽南洋之巫來由人也。此種人大半生南洋羣島。而迤東至太平洋一帶。其文學亙古罕聞。惟祖述亞納伯所制文字。亦無幹濟之才。可以名世者。雜色人族亦分兩種。四

百年前歐人初至美洲。見有一種土人。肌膚畧帶紅色。究所從來。相傳不一。或曰黃人之流亞也。從亞洲轉徙至此。及其著名之兩國。曰墨西哥。曰祕魯。然兩國素無文字。往往結繩紀事。居然有上古遺風焉。

八月初二日記

午刻游英前王若耳日第四故宮。王卽今王維多利亞之伯父。僅在六十餘年以前。而宮室之制。已有與今之洋房不同式者。頗仿中國之式。而壁上丹青。亦多繪中國人物。足見斯時中國聲威尙壯。未嘗不爲英人所企慕也。申刻赴舊隄。觀婦女及兒童遊海。中國開礦。

事事借貸於外，以致得不償失。蓋礦產衰旺，惟礦師知之。而礦師必延歐人，其始必以利市三倍爲之聳聽，迨立合同，購機器，用費不貲，一無所得，礦師不任其咎。旣安享三年俸糈，仍復逍遙局外，而股本已早罄矣。試觀日本百務振興式，杜礦中值銀四十二萬兩，其十三萬兩爲所得之淨利，意輅奴礦中值銀十八萬六千兩，其中六萬爲所得之淨利。中國礦產之富，非諸國所及。卽以煤礦而論，較之歐洲已多二十餘倍。湖北一省之煤，已足抵歐洲之煤。各省出煤之地，合計約二十五萬方里，而山西得十四萬方里，每年如用二百萬噸，通計足

支二千四百三十三年之用。噫，何其盛也。

初三日記

余嘗評論光緒初年以來出洋星使，究以曾惠敏公爲第一。以其資性聰明，頗多材藝，而又得文正之庭訓，在任八年，練習洋務，並諳言語，至今爲洋人所欽慕。伊犁改約一案，弭兵修好，頗著成功。洋藥釐稅併征條約，成於惠敏之手。歲添帑項四五百萬金，頗有裨於國計。越南一役，至於決裂，則以有隱掣其肘者，非辦理不善之咎也。惟其持論或稍游移，始終以多設領事爲無益，未免意存推諉，此其過於聰明之失也。郭筠仙侍郎次之。

侍郎雖力戰清議。以至聲名敗壞。然其心實矢公忠。且他人必無此毅力。無此蕙氣。故居第二。鄭玉軒。黎蕤齋。又次之。玉軒蕤齋。皆君子人也。居心稍慤。所值又非可以見功之地。以至無大建樹。故居第三。第四。陳荔秋。又次之。荔秋雖亦不失爲君子。而膽量更小於鄭黎。實非幹事之材。故居第五。許竹簣。洪文卿。又次之。二君皆聰明有餘。而稍不肯任事。然出洋三年。皆有著述。可傳於世。故居第六。第七。劉芝田。汪芝房。又次之。芝田頗有得於黃老之學。芝房亦其流亞也。故居第八。第九。口口口。張樵野。又次之。口口樵野。才非不敏。而皆累於聲色之

好牟利之工。故居第十第十一。口口口又次之。口口才
學亦頗可觀。口口一役。身名敗裂。故居第十二。口口口
又次之。口口才品本在下中。頗爲京都士大夫所鄙棄。
故居第十三。口口口又次之。口口才力有餘。西學亦精。
一旦得志。器小易盈。其所爲頗近於小人。晚年被譴。永
不敘用。殆由自取。故居第十四。口口口又次之。口口以
氣節自矜。居心實甚巧詐。建議亦多紕謬。足以貽誤大
局。故居第十五。口口口口口又次之。口口以口等公使
自誇。與口人商定約章。誤國病民。爲世大戮。故居第十
六。口口口又次之。口口身居使職。而以賊敗風斯下矣。

故以殿焉。

初四日記

已刻赴新隄觀男女遊水。又觀蚤蝨戲。其法選蚤蝨之肥健者。以絕細銅絲繞於蚤之腹後。以紙爲車。驟視若木質者。使蚤曳之以行。車稍小則負以一蚤。稍大則負以兩蚤。另縛一蚤於車上。若坐客者。爲一小鞭。俾蚤挾之。若揚鞭者然。又爲桔槔之形。使蚤轉之。又爲井與旋機之形。使蚤自轉其機。若汲水者。據云蚤之壽不過半年。未有半年而不死者。而蚤之中選甚難。捕數十蚤。不過選得一蚤。又必操演月餘。始能馴伏。操演之法。初捕

得時先以銅絲縛之。磨其善跳之性。兩旬以後。便使負車。蚤行三四步。必跳。跳則車便翻轉。而蚤六足向上。蠕動久之。始將其車撥正。蚤又行三四步。必仍跳。跳則翻轉如前。如是者不知次數。凡半月而蚤始不跳。可壹意負車矣。其養之也。每夜即使伏於臂上。俾嘬其膚而吮其血。飫之必飽。而力乃健云。

初五日記

英女主維多利亞適值英國極盛之時。其勲業福澤在英國君主中固爲最隆。卽中國帝王自漢以來堪與匹者。不過數人而已。大抵人主貴乘運會。然後賴才德以

濟之維多利亞性行淑均。聰明內蘊。知人善任。固爲國人所稱矣。亦其適值風氣大開。人才輩出。商務之擴。水師之練。工藝之精。正到極至之時。如日月之方中。前乎此則光未滿也。後乎此則勢將昃也。蓋其遭際爲獨難矣。英自失去亞美利加以後。君若臣股。憂數世以全力經營五印度。未及百年而腴壤數萬里。悉爲所併。富強之勢。遂莫之與匹。澳大利亞一洲。亦已墾闢百年。地博物阜。幾與美洲相埒。而加那大與阿非利加諸土。亦皆生聚日完。炎炎之勢。不可抑遏。自今以後。地球諸國。可與英爭衡者。惟俄羅斯耳。然後乎此者。固非維多利亞

所能自主前乎此者亦正非維多利亞所能自爲也夫亦曰時而已矣

初六日記

英國財賦出於關稅地租及國債均由巴力門議納視國家緩急爲輕重實無定額一千七百六十一年至七十四年太平無事納賦英金八百八十萬鎊至一千二十八萬鎊疊次加增至一千八百十六年納賦七千六百八十三萬鎊國債則一千六百八十八年始借六十六萬鎊積至一千八百四十八年共借七萬九千萬鎊是歲出息二千八百十四萬鎊關稅進口茶葉糖加非

酒煙等物。出口皮革煤等物。一千八百五十二年入款。關稅則一千八百七十六萬鎊。地租一千三百九萬鎊。印票錢五百九十三萬鎊。國中財貨出入悉以官印爲憑戶產錢三百五十六萬鎊。以每戶所有玻璃田房產丁戶租稅五百二十萬鎊。信局錢一百六萬鎊。林木官地租稅十五萬鎊。火輪車雜稅等項十七萬鎊。是歲度支所入計其四千八百萬鎊。每年多寡不一。前三年五千一百五十萬鎊。後或五千四百萬鎊。至今日大約七千餘萬鎊矣。出款以一千八百五十一年計之。國債之息二千八百四十八萬鎊。政教官弁養老贍疾之費三十九萬六千鎊。

各衙門俸祿一百九十萬鎊。兵餉六百四十萬鎊。兵船錢糧六百四十三萬鎊。礮位錢糧二百五十五萬鎊。太學及諸公會書院三百五十萬鎊。每歲國用。有時出浮於人。若歲入有餘。則以償國債之存本而減輕其息。有事或更增借也。

初十日記

漢口信云。荊州霪雨連綿。江流暴漲。六月初二日。荊州南學太平口之戴家場。迤東之楊家灘。公安所屬之黃金口。先後決口。驚濤駭浪。平地橫流。遠近鄉鎮俱遭淹沒。西垸之龍王廟。周家嘴。水德寺。西流灣。蕭家臺。鄧家

臺等處水深六七尺。東垵附近各村較西垵尤低。水害過之隄內汪洋浩渺。居民登屋避水。坍塌屋數百椽。沈船百餘艘。此特就江陵言之。所有受水之公安石首枝江松滋。尙不知作何情狀。京師自六月初八至十三日無日不雨。或晝夜不停。各巷民房倒塌。死傷甚多。宣武門因水過深。至一點鐘始啓。永定門內天橋迤南石路上水深過膝。東西兩旁以及埧坡水約丈餘。所奇者水中大魚甚多。未悉由何而出。老年人談及實數十年未經之大雨也。左安門外河溢過橋。泛濫各村莊。田園萬頃。一片汪洋。京東張家灣一帶及西南地面皆成澤國。

南苑一帶尤形窪下民房皆被淹沒又聞德勝門外被
居庸關山澗衝決田廬民畜隨波漂沒京西自白菓河
決口以後永定河涿州房山良鄉等處悉爲澤國北
通州亦自初八至十二日大雨不止將東北城外房屋
衝塌風聲雨聲水聲雜以呼號哀哭之聲聞之酸楚十
三日但見樹杪屋頂災民或隨流遠去或登屋抱樹較
十六年水高五尺桂林自五月至六月連日夜大雨
山水陡發一望無涯居民陸沈浮家爲活登城一望未
沒者僅數版耳廉州自三月二十七日起大雨三晝
夜平城水深丈餘衝倒民房淹斃人口靈山縣一帶亦

被災。欽州三月二十八日風雨極大。城外河漲丈餘。居民被災甚重。

十一日記

天津自五月十三日大雨傾盆。夜以繼日。至二十三日復雨。各河之水同時增漲。永定河水勢尤高。城西三河頭等村打埝約高七八尺。六月初天氣放晴。九河水勢稍平。初六復雨。初七以後無日不大雨如注。十三日尙陰晴不定。低處田疇盡成澤國。十四日則滔滔巨浪捲地而來矣。順屬二十四州縣已報被水者一千四百餘村。此外日有續報。京師連日大雨。九門城牆坍塌甚

多或八九丈或十餘丈不等皆在裏面天津自六月十七日水勢稍殺十八日暴漲如前督轅外鐵橋以東至望海樓一片汪洋法國租界房屋無不在水中央居民遷徙者十七八北河北倉白廟馬家口等村決口三道永定河漫口衝去津邑楊家河莊七八十家波及青光等邑灌入馬駒橋直抵京師安定門外京南附郭下迄通州廬墓田園半成巨浸二百四十里之京津大道不通車馬者累日豫河於十八日決口楊柳青以上三里碾嘴村南岸之水灌入南窪十九晚倒灌佟樓東西樓二十日已至梁家園右旁小營門之外

十二日記

白雷登新舊兩隄。造價皆英金三萬鎊。北通州水災。以道光十八年爲最重。光緒十六年則水又高二尺。今年水災較庚寅年又高五尺。自五月十三日起。無日不雨。運河之水。漲落靡定。二十一日裏河花兒閘。普濟閘。決口。水向西南衝刷各村。六月初八至十一日。淫雨尤甚。東南風大作。運河水漲丈許。漫過壩前。長隄十二夜。忽聞正北似萬馬奔騰聲。人皆譁言山水至矣。旋由房頂漫過。直至北鄉各莊。民有升屋頂者。有攀援上樹者。號哭之聲。遠聞數里。京西之水。出裏河五閘。傾瀉與運

河之水合成一片。漫過卧虎橋。直入北門。門洞中可以
行船。一支入小北門。進東門。灌入北菜市。水深丈餘。臨
城鋪戶全行塌倒。城上周圍拴繫救命繩。豎立雲梯。俾
難民攀援而上。天津九河水勢。繼長增高。幾與隄平。
六月十四日。東門外東浮橋東新街一帶。被水浸潤。十
五日水勢愈高。三岔河口以下。節節皆水。皇船塢外之
擺渡口。同時漫溢。河水疾於奔馬。紫竹林亦一片汪洋。
法工部局迅集人夫。運土打捻。始將來源擋住。此河西
一帶情形也。更以河東言。海河東刷西淤。長隄一道。因
爲駭浪奔濤所齧。每形殘缺。幸皆坵地。堆積鹽斤。爲商

出使日記續刻

卷八

五
傳經樓校本

人貲本所關不忍輕於一擲當將此隄加高培厚鹽坨可保無虞說者謂京師此次大雨非但大於光緒十六年卽嘉慶六年亦無此湯割之勢也

十三日記

余於酉刻挈眷自白雷登還至倫敦使館英外部送到新圖一幅其所擬野人山地中緬之界較三月間所送之圖又稍有更改約自北緯二十五度三十五分格林尼址東經九十八度十四分處之一高山尖岡尼格爾山尖起其綫隨山脊而行西南向過高崙峰及瓦倫山尖下至薩伯坪自薩伯坪起其綫向西而行稍向南

過沙東峰到那緬庫峰。此間卽循南太白江。亦名太白江而行。初係向南。後向西。直至與雷格拉江彙流處。然後循雷格拉江而行。至其源流處。在恩格倫相近。過恩格倫及庫公。至西邊。然後其綫循來色格江而行。由來色格江西首根源起。至與穆雷江彙流處。循穆雷江而行。至本岡。又名木辣世岡相近處之根源。由此卽向南及東南行。至貴高格江。循此江而行。至此江與穆雷江彙流處。然後循穆雷江向西南而行。至與旣陽江彙流處。循旣陽江。至其根源處。在愛路本。然後由南奔江根源起。循南奔江而行。至太平江。

出使日記續刻

卷八

吳傳經樓校本

十五日記

古巴·西班牙屬島也。在西印度羣島中爲最大。北緯自十九度五十分至二十三度九分。經度英京西七十四度八分至八十四度五十八分。西北距美國之佛勒爾勒釐一百四十英里。西南距墨西哥之搖克坦一百三十英里。島形狹長。極長處七百六十四英里。闊自二十五至一百三十英里。戶口一百四十萬。一千八百七十二年中有歐洲人七十六萬有奇。自主之黑奴二十八萬。內有華人約五萬。奴僕三十七萬有奇。沿海皆山礁淺灘。可以行舟者僅三之一。多小島。其較大者曰老司勞諾司曰

羅瞞拏曰土立乃拏曰克羅士東南有昔拉可百里山橫互最高之峰高六千八百九十英尺嶺勢蟠延過嶺長之半北有低平大地地卑溼有鹽澤山林有貴木造舟者取資焉物產惟糖爲最多甲於天下煙葉亦著名於各國嶼分東西二部哈瓦那西部都會也山的阿古東部都會也

十六日記

余現覆英外部所擬野人山地之界應自北緯二十五度三十五分格林尼址東經九十八度十四分卽北京西經十八度十六分處之一高山岡尼格爾山尖起兩

國邊界之綫卽隨此山脊而行向西南過高崙坪及瓦
倫山尖由此過渾昌村與高崙之中間渾昌村歸緬甸
高崙歸中國直至薩伯坪白薩伯坪起其綫向西而行
又稍向南過沙得倫坪到那緬庫坪由此向南隨山脊
而行至大薩爾河自此河源至此河與南太白江相會
如是則分尤葛在東邊雷奔在西邊自大薩爾河與南
太白江彙流處起界綫循南太白江而行至此江與雷
格拉江相會由雷格拉江至其根源在恩格倫相近自
恩格倫起星格倫在西昔馬及穆雷江在東其綫自來
色江西根源起至與南美利江相會處然後由南美利

江而至其根源在奔龍相近。自奔龍向西南方。循列塞江根源而行。至其與穆雷江相會。在克登相近。分克登村及來色江在東。界綫卽隨穆雷江向西南而行。至旣陽江相會。然後隨旣陽江而至其根源處在愛路坪。然後由南奔江根源起。循南奔江而行。至太平江。

十七日記

波爾多黎各。亦西班牙屬島也。在海地與浮金各島之間。北緯自十七度五十六分至十八度三十二分。經度英京西六十五度四十分至六十七度二十分。南濱加勒海。北濱大西洋。東西長一百十英里。南北闊四十英

里共三千五百三十英方里。戶口一千八百六十年白人三十

萬有奇。自主黑人二十四萬一千有奇。黑奴四萬一千

有奇。共六十一萬七千餘人。地形崎嶇。土極肥沃。水土

益人。東西有山亘於全島。山麓小川下注。密如蛛網。海

口亦多。帆船如織。人以製糖釀酒。種加非烟葉爲首務。

牧次之。耕又次之。一千八百七十三年。出口糖值英金

一百五十八萬餘鎊。糖漿值十四萬三千餘鎊。加非值

九十二萬九千餘鎊。次年出口貨共值英金二百五十

二萬四千餘鎊。通商以西班牙及西班牙墨洲屬地美

英德各國爲多。電綫已通各大城。鐵路十二英里。島分

七部轄於數大武員三助伐其都會也

十八日記

羅馬尼亞國卽志略所稱土耳其襍拉幾亞及穆爾達
費亞兩部之地也東北界勃魯脫河過此卽俄之貝沙
拉比部西北界加爾巴脫嶺過此卽奧之布哥維納及
達郎西里尼部南界多惱河過此卽布加利亞國西界
賽爾斐亞國東瀕黑海地當赤道北四十三度三十八
分至四十八度十五分京師西八十六度四十八分至
九十三度五十八分巴黎東二十度十分凡十二萬九
千九百四十七啟羅適當方里居民五百三十七萬六

干有奇。初羅馬尼亞兩部皆希臘種人。蓋古羅馬裔也。所奉之教與俄同。與土異。土人復苛歛虐待。咸豐十一年。兩部合力叛土。奉總兵古士爲王。號羅馬尼亞半主。屬國。歲貢方物。土人無如之何。越六年。古士被廢。同治五年。各國議立沙勒爾爲王。德王姪也。光緒三年。俄復攻土。沙勒爾趁機立爲自主之國。明年各國大會柏林。議許設政府。遣公使。國中鐵路長四千五百九十四里。似係中里電綫二萬一千五百六十里。郵局三百九十所。出口貨值洋銀六十八兆六十六萬餘員。進口貨值洋銀一百九兆十七萬餘員。國債二百五十八兆三十萬員。

國分三十二郡。都城曰布加勒司。當赤道北四十四度二十五分。京師西九十度二十三分。巴黎東二十三度四十五分。

十九日記

慶謁堂來書云。近日與俄外部侍郎會晤二次。與暹爾斯會晤二次。俄皇自丹馬國寄諭外部。謂慶常所論中俄大局。甚爲切當。爰命外部與兵部會議辦法。以備還都開議。按喀約但有清文俄文。而無漢文。查清文原本。並無華界一直往南之語。不過至烏仔別里而止。下文僅有向南二字而已。此層總署已經明曉。大約酌中之

道或能辦到。然必由署中作主。外間祇能催商而已。始俄一味推宕。置諸不理。故樞堂孫尙書有調員之議。幸俄主尙顧大局。允許商議。并飭外兵二部預備辦法。約以還都開議。現請嘆大臣速將辦法略爲指示。彼力疾由鄉回城。面晤兵部。期以七八日內先將大旨梗概相告。俟西十二月俄主回國。再行商辦。彼謂界務繁冗。非與俄主披圖面陳。不能妥協。此須俄主自定。不敢擅專。似非欺人語也。又來書云。聞竹使有勸總署退讓之說。竊思尙未開議。先自落價。彼將得步進步。更難收束。入春以後。外部不理。竹使詞色令人難堪。竹使二年以來。

專與俄總辦模稜遷就未得一與噶爾斯交談宜其不得要領耳。

二十日記

賽爾斐亞國故土耳其屬部也北界奧斯馬加東北界羅馬尼亞東界布加利亞西界奧國之波斯尼亞省南界土國之沙羅尼克及馬拿斯底爾省凡四萬八千五百八十八畝羅邁當方里居民二百二十一萬三千有奇此國本歐東舊邦自明天順三年以後始屬於土嘉慶五年叛土自立土王因以封之而責其入貢後有米老斯瓦伯烈拿佛者賽國之將也屢戰勝土道光十年

出使日記續刻

卷八

至
傳經樓校本

國人奉以爲王是爲瓦伯烈拿佛第一其孫爲今王密朗第四賽人故斯拉夫種強武好鬪俄以其同族輒左右之與土血戰二十餘年尙未得志俄土之戰諸部羣起應俄柏林之約立爲自主之國光緒十七年出口貨值洋銀十三兆一萬二千員進口貨值洋銀十兆五十二萬一千五百員國債洋銀七兆十八萬五千員都城曰貝爾格拉得志略作別甲約章類纂作柏格拉其水皆匯多惱河以注於黑海國分十五部貝爾格拉得城當赤道北四十四度四十七分京師西九十九度二分巴黎東十八度六分

二十一日記

布加利亞國。故土耳其屬部。卽志略所稱西里斯的黎

亞地也。

志略一作不牙

北阻多惱河。與羅馬尼亞交界。南枕巴

爾互山。與東羅美里交界。東瀕黑海。西隣賽爾斐亞。凡

六萬三千九百七十二。啟羅邁當方里。居民一百九十

九萬八千九百有奇。布加利亞種人居其三。皆奉希臘

教。土耳其種人居其一。皆奉回教。兩教積不相能。土廷

尤暴斂其民。初高加索部人有去俄奔土者數千人。土

人使居布地。性悍喜鬪。光緒二年。布人戕殺回民。土廷

急發高加索人捕斬萬五千人。俄王亞力山德第二因

此伐土。土人力竭請和。四年柏林之約。議定東羅美里

爲自主之省。布加利亞爲半主之國。雖附庸於土。其王
則由國人推立。亦有政府議院。今已駸駸強盛矣。鐵路
長一千四百四十八里。八百六十六法里。電綫長一萬四百四十
八里。八千四百八十四法里。光緒十七年出口貨值洋銀十七兆
七十六萬六千員。進口貨值洋銀二十兆三十三萬七
千員。國債洋銀三兆四十六萬三千員。國分十四郡。都
城曰沙非亞。當赤道北四十二度三十九分。京師西九
十三度十四分。巴黎東二十度五十四分

二十二日記

門得內各羅。

一作門得內哥

譯言黑山。故土耳其屬部。卽志略

所稱黑坐義部也。北界波斯尼亞，赫次戈偉訥，東界哥沙伏，南界阿爾罷尼，西界阿得安海，周圍八千四百七十五啟羅邁當方里，居民二十七萬二千有奇。四圍皆山，萬木叢列，一望如墨，故有黑山之稱。本賽爾斐亞之一地，明天順間，土兵攻賽爾國，下之，獨門民據險扼守，避匿車爾拿哥刺山中。至今石室如蜂房。康熙四十九年，門國王貝德羅威脫始與俄立約，拒土，號稱自主，以保護希臘教。明年與土戰，土兵死者二萬人。於是門益附俄。咸豐二年，土伐門，又敗去。各國助門，抑土。同治元年，土攻門，圍其塞，聽納都城，門請盟。土脅使內屬，俄人不

許光緒二年門士復戰進踞斯居大里柏林之會各國
立門爲自主國且強土割地因其不通海並以盎底佛
利及端爾西紐兩海口界之又益以波特哥利寨礮臺
之地而斯居大里湖亦分其半如是立國始定惟地陬
產瘠故不立議院不遣公使惟有執政紳員八人國人
皆隸兵籍性勇猛亦有鐵路電綫每歲出口貨約值洋
銀五十萬員有牲皮毛乳油之屬歲入約洋銀二十五
萬員有地稅關稅鹽釐牲捐之屬都城曰塞聽納一作塞吞
葉當赤道北四十二度二十六分京師西九十七度二
十九分

巴黎東十六
度三十九分

二十三日記

土耳其蓋突厥之遺種以回鶻本字譯之音亦相近自唐以後突厥衰弱散居蔥嶺東西漸徙漸遠今所稱圖爾齊斯坦部落及土耳其國實皆突厥之後泰西圖志頗述其所自出焉迨蒙古強盛服屬西域各回部土耳其人逃居小亞細亞山地即美諾部落益繁元大德三年其酋阿多曼第一據地立國自稱蘇丹變游牧爲城郭復伐東羅馬攻地中海諸島是爲土耳其建國之始泰定以後征服小亞細亞諸地以亞那多里亞譯言東方之布魯薩爲都城遂逼他大尼里海峽以窺君士但丁並略

地於歐洲至正二十年後東取亞洲猶太敘里諸部西
取歐洲阿得利安或作安多黎諾伯勒都之是爲土耳其建國東
羅馬之始明洪武五年攻布加利亞賽爾斐亞又據波
斯尼亞及亞刺萬二十二年巴牙屑第一立復略布加
利亞賽爾斐亞機拉幾穆爾達維擊匈牙利大破日耳
曼法蘭西兵更入希臘圍君士但丁建文四年巴牙屑
大敗於昂哥拉爲撒馬兒罕所虜憂死三子分立至永
樂十一年始復合一景泰四年大舉伐東羅馬滅之改
君士但丁曰伊斯坦蒲耳建都於此

二十四日記

東羅馬自君士但丁第一開國。越一千二百三十年。至
君士但丁第十三。而爲土耳其所滅。土人遂攻波斯。伐
阿剌伯。奪希臘。並侵俄羅斯南境之克雷木。卽小韃靼
大里東境之威尼斯。戰勝攻取。聲威震爍。用兵慘殺尤
甚。政刑賦稅嚴酷煩苛。正德年間。復破波斯。克埃及。敘
里。巴雷斯丁。據麥加。阿剌伯都城阿爾及耳。阿洲北境沙立曼第
二立梟雄好兵。於亞洲得阿爾美尼。古爾第斯丹諸地。
於阿洲得突尼斯。的黎波里。於歐洲攻日耳曼。侵奧地
利牙。匈牙利諸地。據地中海之羅得及毛爾他島。其疆
域跨有三洲。所向克捷。自摩罕默都君士但丁後。以此

爲極盛矣。嘉靖年間，奪薩魄婁斯島。旣而兵敗，厥後漸以不振。且有內亂。

國朝順治六年，以兵擊干地亞島，踞之。然累世黷武行，暴叛者蠭起。阿爾及耳、突尼斯的黎波里埃及諸部皆亂，所得奧地利、匈牙利侵地亦失去大半。俄奧波蘭連兵來伐，大敗土兵。乾隆五十二年，失高加索諸地。與俄忽和，忽戰又失多惱河附近諸地。嘉慶二十四年，英取意阿尼諸島。見志略厥後希臘復立國，稱自主。俄又侵奪阿爾美尼亞邊地，並以護教爲名，議將褫拉幾、穆爾達維、賽爾斐亞諸部，建爲土附庸納貢之國。

二十五日記

俄既立賽爾斐亞等爲半主之國。法國亦據阿爾及耳。而埃及巴札亦叛。踞叙里士人擊之。敗於可尼。埃及兵抵布魯薩。君士但丁戒嚴。俄兵來救。埃及兵乃退。道光十九年。埃及尙據阿刺伯敘里。復克干地亞島。土人求救於英法俄國。埃及始返侵地。仍稱藩國。次年各國公使會於倫敦。議定土國海峽。無論何國兵船。不得出入。其後俄土復以教事起釁。土人奉回教。輒虐待希臘教人。俄命將率師。越多惱河而壓其境。英法恐俄之坐大也。皆以師船駐保君士但丁。土軍禦俄。亦屢獲勝。四年。

英法水陸會師進圍俄京之克雷木五年克之遂以師
船駛入波羅的海擾俄彼此攻守死傷且近百萬六年
奧王居間排解各國遣使會於巴黎立約凡黑海之內
不許俄士置戍屯艦而許各國商賈出入瀕海諸埠兼
設領事俄悉返土侵地光緒三年俄士復搆兵羅馬尼
亞遂稱自主以兵六萬歸俄調遣俄兵益盛一軍渡多
惱河而南據多布魯卡今屬羅國一軍溯多惱河而西奪尼
哥波利今屬布國遂踰巴爾互山據脫刺斯君士但丁大震
亞洲俄軍進攻巴統今屬俄圍卡爾斯今屬俄土雖屢勝而
終不支乞和於俄四年立定草約英人阻之德相畢士

麻出爲排解遂以是年五月各國遣使大會於柏林

二十六日記

先是咸豐六年俄土之約以貝沙拉比

在黑海西北岸多瑙河下游北

割歸羅馬尼亞至是以所割多布魯卡

在黑海西岸多瑙河下游南

易之由是羅馬尼亞得多布魯卡賽爾斐亞得尼士門

得內各羅得茲底佛利端爾西紐兩海口以布加利亞

爲附庸之國以東羅美里爲自主之省奧國得波斯尼

亞赫次戈偉納兩省其後希臘又割賴利沙

希東美查北境

瓦北境耶尼拿

希西

之地其償俄兵費三百兆盧布暫

從緩繳作爲欠款亞洲屬地俄割卡爾斯巴統阿達亨

一作阿爾達

三處

英得薩魄斐斯島而埃及則自治

如故蓋歐洲舊疆去其大半而亞洲之地亦稍蹙矣

土爾其尙回教稱其王曰蘇丹光緒二年始仿泰西設

上下議院然蘇丹爲回部政教之主其權仍在也民多

游牧而少耕種窮而且懶天下棄田不耕者以土國爲

最多近始講農牧製造之宜材木礦冶貿易之政而興

作營運皆賴泰西人爲之國中鐵路長九百六十三啟

羅邁當電綫長五萬三百七啟羅邁當海綫六百四十

二啟羅邁當商輪四十三艘光緒十六年進口貨值洋

銀二千一百四兆十五萬餘員出口貨值洋銀一千五

百十七兆二十四萬餘員。國債洋銀六百二十五兆九十五萬餘員。所借民債尙不在內。各國負債之多。無如土耳其者。

二十八日記

土耳其東西跨亞歐兩洲。南涉阿非利加洲。幅員廣袤。種類龐雜。自光緒四年柏林立約以後。疆域建置。今異於昔。其歐洲之地。自赤道北三十八度五十五分至四十四度十七分。京師西八十七度二十分至九十六度四十八分。巴黎東十七度二十分。至二十六度四十八分。凡二十六萬五千一百九十三啟羅邁當方里。合布加利亞東羅美里在內。居民八兆七

十五萬四千三百有奇。亞洲之地自赤道北十八度至

四十二度。京師西六十八度至九十度。

巴黎東二十四度至四十六度

凡一兆七十七萬八千二百枚羅邁當方里。

合阿刺伯在內

民十五兆四十七萬五千有奇。阿洲之地自赤道北二

十七度至三十三度。京師西九十二度至一百四度。

巴黎

東十度至二十二度

凡一兆三萬三千枚羅邁當方里。居民一百

萬有奇。卽的黎波里部也。凡歐洲新立諸邦及割歸他
屬者。今皆別著於篇。卽亞洲之阿刺伯。阿洲之埃及的
黎波里。亦分隸於本洲。庶別部居而免雜廁云。

九月庚辰朔記

歐洲土耳其西北界奧斯馬加賽爾斐亞門得內各羅
北界羅馬尼亞布加利亞西南界希臘東瀕黑海西瀕
亞得亞海南瀕伊直安海外環地中海卽志略所稱土
耳其西土也其地西北高而東南下有巴爾互嶺西起
沙非亞布加利亞京城東趨黑海界乎布加利亞及東羅美里
之間爲北界天然屏蔽其陰坡陀迤邐其陽壁立陡絕
分支展脈互遞層接自多惱河踰巴東互至於君士但
丁有路七條危崖微徑不易穿越其水有多惱河經流
賽羅布三國交界復東北入於黑海今不在土國境內蓋合上
下游計之流五千里有奇矣又有馬利脫沙江東南流

六百八十里入伊直安海。瓦爾大利河東南流五百里入伊直安海。

初三日記

歐洲土國地分九部。君士但丁諾魄爾部亦稱君士但丁。土國建都地也。連附郭凡二千五百四十九啟羅邁當方里。居民八十二萬五千。城同部名。當赤道北四十一度零三十秒。京師西八十七度二十九分。凡二十八門。周圍八十二里有奇。地三角形。東狹西寬。形勝爲天下第一。故號金角。有山七盤。王宮在其上。馬罕默第二所造也。土產細絲絨毯烟葉香水。其鐵路自京城通安

多黎諾伯勒貝路瓦梯奴瓦堆塞阿加脫克其郵船北
通黑海南通地中海各口諸國商貨畢集又曰安多黎
諾伯勒部曰沙羅尼克部曰馬拿斯底爾部曰哥沙伏
部曰斯居大里部曰耶尼拿部曰東羅美里自主部歲
貢土廷洋銀五萬員曰干地亞島部

初四日記

亞洲土耳其東北界俄屬高加索部東界波斯東南界
阿刺伯沙漠西北瀕馬爾馬拉海北瀕黑海西南瀕地
中海與歐洲僅隔頗斯福爾他大尼里兩海峽卽志略
所稱土耳其東土中土也其地多叢山大江在高加索

部及阿爾美尼部交界有阿拉辣山

志略作阿臘

高一千六

百餘丈西南趨地中海岸南爲朵留斯山稍北爲崙底

山地中海東岸則有阿馬隅山崙沙非山而尤以黎巴

嫩及崙底黎巴嫩兩山爲大岡嶺蜿蜒各長八百餘里

東北有蓋徐意非馬克江流一千六百餘里入黑海又

有惹格利亞江流入黑海哀爾禺口江美崙特來江皆

流入伊直安海比拉摩斯江流入地中海東有歐付拉

脫

志略作阿脫付臘底斯

底格爾

志略作底格爾士

兩大江歐付拉脫江發

源阿爾美尼南境山中曲折流過阿爾魄山東南踰沙

漠至古爾拿與底格爾江合曲折流入波斯灣注印度

海計歐付拉脫江流長三千三百二十里底格爾江流長二千二百二十里

初五日記

亞洲土國地分十七部曰德勒比孫達部曰愛爾瑞羅

木部

志略作黑爾斯倫

占阿爾美尼國之都城也自阿爾美尼

爲俄上分裂遂以城名爲部名曰望部以在望湖之東

而名曰加爾蒲脫部曰第亞爾培基爾部曰摩蘇爾部

曰巴格大達部卽元史所稱報達國地亦卽巴比倫國

舊地也曰巴索拉部譯言石地

右四部古美索巴大米地

曰西威斯

部或名務魯木曰加斯達摩尼部曰昂哥拉部曰古大

房提基亞爾部每歲出絲值洋銀一千萬員曰愛逮部

曰可尼部卽古加拉馬尼亞地曰亞達那部

右七部古亞細亞美

地諾曰阿爾魄部曰西里亞部

亦作敘里

卽明史外國傳所稱

古如德亞國地也迤北卽古腓尼基地中卽古西里亞

地迤南卽古猶太地及羅馬興皆爲所滅厥後嘗屬於

波斯阿剌伯明正德九年始屬於土國今攷其分省曰

大馬士卽西里亞會城也曰特惹貝爾意大利滂卽黎巴

嫩山地也曰哀爾哥特其會城曰耶路撒冷卽巴雷斯

丁地也按哀爾哥特西史謂卽古斐雷斯丹人所居之

地斐雷當卽拂蘇之轉音斯丹當卽斯坦之轉音昔人

謂猶太卽唐拂菻國。據此益信。有耶穌墓。西人稱爲聖地。及爲回部所據。嘗因爭謁墓地。教士糾各國用兵。號十字軍。血戰二百餘年。近始稍息矣。

初六日記

前儒謂乾以氣化形。乾之氣有清中之清。清中之濁。坤以形化氣。坤之氣有濁中之清。濁中之濁。西人每稱輕氣。淡氣。養氣。炭氣。輕者。清中之清。淡者。清中之濁也。養者。濁中之清。炭者。濁中之濁也。水火者。天地之大作用也。水質得天氣三分。地氣四分。相合而成。西人謂輕氣得二。養氣得一者。其理相通。天地間惟水火力最大。亦

惟水火作用無窮。泰西格致之學有創有因。電學創於隨爾得。因而有電堆電池電報之致。火學始於莫斯得。因而有火車火船火機之致。譬之蒸氣創自希羅。吸力因於生董。化學定於拉瓦泄。後各有因此創彼。愈出愈奇。最大最速之風。每點鐘行八十英里。尋常之風。每點鐘有不到十英里者。最激最速之水。每點鐘行十英里。若泰晤士江。每點鐘不過行二三英里。用煤火之力。百分僅能做得電氣之力八十分。稍有折耗。然潔淨無煙。而又格外明亮。則勝矣。將來有擬以江水之力。做電氣者。如水磨水碓是也。有擬以風力做電氣者。如

風蓬風車是也如是則煤可省矣亦可用人力牛馬力造電氣

初七日記

英戶部尚書在議院將出入款項總數逐條宣示查一千八百九十二三兩年之間所估出款九千零二十五萬三千鎊後又多發十二萬二千鎊原估進款九千零四十五萬三千鎊厥後短收五萬八千鎊分而計之原估關稅一千九百九十萬鎊短收十八萬五千鎊內地雜課原估五千四百八十六萬二千鎊實徵多八萬餘鎊郵部進款等於原估之數然郵部用項過巨入款似

少非遂政府之願也。茲查九十三四兩年之間，通國經費應估九千一百四十六萬四千鎊。分而言之，來年關稅可徵一千九百六十五萬鎊，比前少收六萬五千鎊。內地造銷各貨之稅可徵二千五百十萬鎊，比前少收二十六萬鎊。各種課可徵一百三十六萬鎊，比前少收二十萬五千鎊。地稅房租等項可徵四十六萬鎊，比前盈餘一萬鎊。官民進項交課可徵一千三百四十萬鎊，比前短收七萬鎊。

初八日記

法人有著說者云：以武備言，美國實非可畏，以節用論，

美國強於歐洲。美當南北大戰之時。借債甚多。今可於
一千數百年以前。掃數清償矣。歐洲各國之債。有十二
萬六千兆佛郎。尙無清完之日。美國額設陸兵二萬六
千。僅及法兵十九分之一。一千八百七十年間。歐洲備
兵用款三千兆佛郎。今增至五千兆矣。歐洲養兵不過
二百餘萬。今增至三百五十餘萬矣。英國人一名吳
得凱。一名克林飛者。同創自放連珠槍一具。此槍彈袋
可裝槍彈七箇。於二秒工夫以內。不但能放七彈。且有
餘暇更換新袋。故於一分之內。可放一百零五彈也。凡
此新式之槍。亦比別種之槍。尤能命中及遠。蓋因七彈

既放之後空袋自落既可不改槍勢復裝實彈非如他槍須將槍筒落下始能換裝彈袋也 新槍無煙火藥名曰高爾岱即繩藥也以其形似繩也利於行軍各國競相仿造然此藥必有棉花攪和久儲則壞俄國曾於八閱月前製藥備用儻再閱五月則必盡成廢物經製造人多方設法莫能奏效

初九日記

英阿姆斯特脫郎廠代阿根廷即拉巴拉他國造就新式快船一隻名曰耐音德竹羅此船長三百五十尺寬四十四尺重三千五百噸所載軍器有六寸快礮四尊四

寸七分快礮八尊。哈克開司三磅彈礮十二尊。一磅彈礮一尊。魚雷筒五具。乃費優默所創十八寸之雷。雷長十六尺五寸。放雷之機。式樣新奇。筒內先燃高爾岱藥少許。藥氣催動魚雷。推之出筒。先是屢用常行火藥催雷出筒。無如藥之壓力不勻。雷之速率不準。阿廠多方考究。務除不勻不準。及飛煙吹灰等弊。爰用高爾岱藥。演放魚雷多次。以每方寸三十磅之壓力。得每秒四十二尺之速率。雷筒安有電氣放雷之具。亦安機器放雷之具。電氣放雷。登樓瞭望。毫無危險。始燃藥放雷。離筒而去。雷筒一具。安於船頭。向前直放。船之兩旁。各有雷

筒兩具。一具向前放雷。一具向後放雷。故可前擊後擊。左擊右擊。無不遂意。

十三日記

是年牛莊洋貨進口價值轉運出口之數不計銀五百十六萬餘兩。土貨出口價值銀出口並在別口在內九百六萬餘兩。天津進口洋貨價銀一千七百八十六萬餘兩。出口土貨價銀六百四十一萬餘兩。煙台進口洋貨價銀五百八十七萬餘兩。出口土貨價銀五百十六萬餘兩。重慶進口洋貨價銀五百八十二萬餘兩。出口土貨三百三萬餘兩。宜昌進口洋貨價銀六十萬餘兩。出口土貨三十五萬

餘兩。漢口進口洋貨銀一千一百九十萬餘兩。出口土
貨一千九百五十六萬餘兩。九江進口洋貨銀四百七
十五萬餘兩。出口土貨銀六百二十一萬餘兩。蕪湖進
口洋貨銀三百九十三萬餘兩。出口土貨銀五百二十
四萬餘兩。鎮江進口洋貨銀九百八十九萬餘兩。鎮江少出
口土貨上海進口洋貨銀一千五百零一萬餘兩。出口

土貨銀三千八百八十五萬餘兩。甯波進口洋貨銀六
百六十九萬餘兩。出口土貨銀四百九十四萬餘兩。溫
州進口洋貨銀四十萬餘兩。出口價銀十八萬餘兩。福
州進口價銀四百三十二萬餘兩。出口價銀六百七十

萬餘兩。淡水進口價銀一百七十八萬餘兩。出口價銀三百四十二萬餘兩。臺南進口價銀一百二十萬餘兩。出口價銀一百五十三萬餘兩。廈門進口價銀五百七十一萬餘兩。出口價銀二百二十三萬餘兩。汕頭進口價銀八百三十四萬餘兩。出口價銀六百八十一萬餘兩。廣州進口價銀一千二百四十一萬餘兩。出口價銀一千八百八十八萬餘兩。九龍進口價銀一千三百四十六萬餘兩。出口價銀一千七百二十九萬餘兩。拱北進口價銀三百十七萬餘兩。出口價銀三百八十三萬餘兩。瓊州進口價銀八十六萬餘兩。出口價銀一百萬

餘兩。北海進口價銀三百十二萬餘兩。出口價銀一百零九萬餘兩。龍州進口價銀二萬六千餘兩。出口價銀一萬零九百兩。蒙自進口價銀八十八萬餘兩。出口價銀七十三萬餘兩。

十五日記

法報云。中國趕築鐵路。以備悉畢爾運兵之用。自天津起。至北河口塘沽地方。復向東北。遵行海岸。至開平煤礦。共分四段。首段自天津至開平煤礦。約長二百九十里。次段自開平至灤州。約長一百二十四里。此段灤河之橋。尙未成功。現正安打橋柱。此橋安柱十六根。六十

一邁寬之橋洞五空。三十邁寬之橋洞十空。十邁寬之橋洞五十空。三段自灤州至山海關。約長一百九十里。四段自山海關至錦州。約長二百三十六里。以上鐵路四段。共約九百四十里。通長路已修墊完畢。惟鐵軌僅至灤州。俟灤河橋工告竣。即可造軌出山海關矣。灤河底有浮沙。安柱不牢。現在力求穩固結實之法。

十六日記

加那大全境平行。惟西北有落機大山。北自亞蠟斯干省。南至中墨洲爲止。崇山峻嶺。長五千餘里。中有三大嶺。一東嶺曰杞伯文斯。一西嶺多平原。一太平洋嶺。地

勢斜狹中多火山。加那大西北各部落。機山居其大半。有馬根西大江。向西北流。入於太平洋。長二千三百英里。中間江口無數。其支江曰烏雷江。披爾江。皮埃江。福脫錫魄生江。福脫諾門江。福脫哥特化坡江。又有漢江。披斯江。阿泰伯斯堪江。蘇比釐阿湖。湖身之大。爲地球之冠。東北至加那大。南至美國之密執安部。威士干遜部。西至美國新闢之明納沙泰部。自東至西。長四百二十九英里。南北廣一百六十英里。湖岸整齊。不生草木。

十八日記

加那大東海各島。一曰恩的可斯的島。屬貴北克省。在桑羅稜案海灣中。判分兩邊海峽。長一百四十英里。極廣處三十英里。島中山高六百英尺。有兩福地。一在島之西尖。曰衣力斯灣。一在島之西北。曰福克司灣。天氣嚴寒。居民甚稀。惟夏季則帆船林立。獵人皆至。一曰格倫門納島。屬新布倫瑞克省。適居本省與新蘇格蘭兩省之間。在芬田灣之入口處。與美國之緬部相近。南北長十英里。廣八英里。一曰密寬倫島。在紐芬蘭之南。爲法國屬島。分大小密寬倫。大密寬倫在赤道北四十七度四分。京師西一百七十二度四十八分二十二秒。小

密寬倫在大密寬倫之南。或曰稜蘊。居民八百。捕魚爲業。一曰森披埃島。周圍峻峭。不生蔬果。亦法國屬島。與密寬倫合之。島面積八十一英方里。居民四千餘人。

十九日記

五印度。古天竺也。一名身毒國。幅員遼闊。地勢三角形。每邊六千里。大小數十國。從古不相統一。明初蒙古某王爲元駙馬鐵木兒之後。兼并西域諸回部。南侵印度。得入版圖。號曰大蒙古。建都中印度之德希城。廣袤二萬里。歲收賦稅二萬二千四百萬。各國皆賓服焉。正德中。葡萄牙人初至西邊貿易。荷西英法等國繼之。然大

蒙古王威權重大人皆畏之厥後眾子爭權內亂並起各部酋長乘間跋扈四分五裂國勢漸衰乾隆二十年孟加臘土酋與法人密約拒擊英人殄其大半英乃徵兵入安額河克之東印度望風歸服乘勝席捲中南諸部三十年又叛英人英遣將奪復疆土嘉慶十年盡驅法荷駐印之兵自是五印度之地歸其囊括者十七八蒙古王亦納款今後裔雖存食稅衣租僅擁虛號而已其餘設官置吏同於郡縣或輸賦納貢降爲藩服沿海建立三碼頭曰孟加臘所以控其東陲曰麻拉薩所以扼其南疆曰孟買所以鈐其西北

二十日記

英人又於亞加拉諸部及錫蘭島俱鎮以大帥。戍以重兵。特遣勳戚大臣爲總督。便宜行事。分駐孟加臘及巴勒里。額設英軍三萬。土軍十八萬二千。或輪調駐防。或派充工役。其人釋教回教各半。互相牽制。免其同心謀叛。中東二印度地勢平行。物產殷阜。火車鐵路。四通八達。孟加臘之會城曰噶爾格達。西南洋第一繁盛之區。居民八十萬戶。有地稅房稅招牌稅牲畜稅水火稅百工技藝皆有捐。一馬一牛必納課。然民無怨言者。以較昔之土酋。猶少誅求也。所入之財。除官俸兵餉外。一切

修治道路橋梁輪船火車電綫煤燈學堂醫院之類民
多便之南印度瀕海多山山內之民仍其舊俗英不煩
兵力而服之西北二印度風氣剛勁北印度卽古之罽
賓西印度卽古之月氏迭爲興衰互相吞併今爲塞哥
及阿富汗國素稱強大嘉慶年間塞王侵英藩屬道光
二十二年大舉南侵屢挫英軍相持二年卒爲英將所
破割地受盟次第削平叛者於是上尊號於英皇蓋前
侵佔印度皆公司所爲至是始歸英皇統轄焉阿富汗
與英構難數十年或勝或負時戰時和大抵皆俄人從
中怂惠嗣後英軍大勝直搗甲布阿王遠遁俄境其子

阿古柏襲位。又因民變戕英大員。英人復立其弟。英之力非不能滅阿。特留以爲屏蔽耳。夫俄欲滅土耳其而英扼之。英欲滅阿富汗而俄尼之。殆形勢相格也。

二十一日記

印度自漢始通中國。武帝明帝皆嘗遣使天竺。晉唐以後。中土請經求律之僧。踵趾相接。凡有三道。一由和闐南行。經毒龍池。躡懸綆。過沙河。入罽賓國。是爲東道。卽晉法顯北魏慧生所行之程也。一由伊犁西行。歷霍罕至賽馬爾罕。折而東南。踰鐵門。渡縛芻河。越興都哥士大雪山。入克什彌爾。是爲西道。卽唐僧元奘及元邱道

人處機所行之程也。一由葉爾羌西南行，循徒多河而上，陟蔥嶺，至塞勒庫兒泊，再南踰印度河，是爲中道。卽唐僧元奘歸途所經之程也。中國用兵印度，惟唐太宗、元太祖俱獲全勝。憲宗之世，屢征印度，然終以雪山之隔，鞭長莫及。旋得旋失。夫西藏與印度密邇，中隔大山數重，繚互數千里，峻嶺危峰，道途險阻。八月以後，大雪封山，往來絕迹。此天所以限中外也。惟大吉嶺一路，最爲扼要。其土酋已降於英，其民語言風俗，與唐古特相同。地勢高寒，印度富商多在此築別墅以避暑。英設領事一員，統兵副帥亦駐焉。修建碉堡數座，設鐵路以通。

往來此間別無通都大邑商貨薈萃之所英人不惜重費開通道路其注意西藏通商久矣印度公司經營利源無孔不入以重賂要結布丹錫金諸族入其牢籠惟廓爾喀一部較強地形險要僅能自保

二十二日記

英人於孟加拉之東闢一地曰亞山又名阿薩密長一千餘里廣三四百里北界布魯克巴即布丹東界貉俞野人東南界緬甸四境多山惟蒲藍布達江兩岸平壤膏腴近年墾地種茶漸致繁盛每歲出茶數十萬箱然不若華產之良也亞山之東南有數小部俱已降附於英

再南海灣有新埠曰徹地岡曰埃克雅在阿拉干部內
阿拉干之東曰跋散曰漾貢曰摸兒面曰黑尼曰梯泥
色領皆通商碼頭昔本緬地道光年割隸於英自徹地
岡至梯尼色領沿海七八千里英置兵吏設電綫通文
報悉統於印度大帥華人但知英據印度財賦所出倚
爲外府不知其得緬暹諸國海濱精華之區由印度直
達新嘉坡聲勢相聯也至他國市埠之在印度者則有
葡萄牙之料襪法蘭西之本得支黎哥黎架爾二郡然
亦不過一城一邑寄頓貨物之所孟買本葡屬後讓於
英麻力普爾本丹馬所屬距嘎爾格達四十里亦美邑

也。今爲英人屯軍之所。巴勒里界連後藏。嘉慶十九年。爲廓爾喀所據。英以數萬金購得之。

二十三日記

印度總督行館所在星姆辣。

一作新拉

有鐵路相通。各部遇

有大事。仍由電報請命焉。蓋印度爲佛教所興。漢唐以後。可謂盛矣。無何回教起自天方。漸染蔥嶺左右。迄今印度之民。皆舍釋迦牟尼而拜謨罕。默德。鷲嶺。雞峯。河山依舊。舍衛鹿苑。遺跡蕩然。所謂慧光照於震旦。而淨土反滋他族。良可慨矣。其紅教黃教。行於三藏及內外蒙古者。乃釋氏之別派。此外惟緬甸暹羅越南。尚遵佛

教夫釋氏以慈悲爲主。持齋戒殺。漸致柔弱。回教專尙堅忍。百折不回。今復益以天主耶穌教。三教之勢。遂若冰炭。或又稱印度爲婆羅門教。不知此乃種類之名。非教名也。蓋印度人分四等。上品爲婆羅門。凡酋長職官。皆此族爲之。其下爲兵。爲商。爲工役。各世其業。無相奪倫。有圖畫眉稜角及卽堂等處者。大抵雕題之舊俗歟。此五印度之大略也。

二十四日記

江洪卽車里土司也。外部送來節略云。江洪東北爲細魄松板納之猛犸。佔括南犸江上游之全地。南犸江及

南德江之水流分界處。卽接連近布分之法國地。此地之下。卽南德江。又名黑江。此處已算法國地矣。猛犸之南。江洪邊界之地。至江鎮止。係在猛拉地內。佔括南拉江上游之全地。東邊南拉江及南犍江之水流分界處。可爲實在之邊界。界綫可以劃得極清。此嶺上一山口相近處。有柱數條。名曰大辣干。數百年前所建。大辣干卽金柱之意。今雖僅存其柱。而此地自古以來。皆認爲江洪與隆勃刺邦又譯爲郎派雷防之界綫。我們游歷其地。有刻字石碑一小塊。今尙存於我處。我想此卽所說之老辣干。又名阿倫辣吉。但其上無旗。亦不與安南相干涉。自大

辣干起。猛犸之邊界轉而向西。此處南犸江與南太江之水流分界處。爲天然之界綫。但江洪之地。展及於南太江低地處。南太江及南拉江之水流分界處。頗低。界限難分。邊界綫過南太江之支江。南德倫江之低地。截大麥鹿高岡爲二。由此上高山脊。此山脊卽在江鎮之後。此界綫不清。無處可爲好界限。因南太江之低地。連江洪內各小地。皆山嶺崎嶇。人民稀少。皆游行無定之土番。亦無貴重之樹木。僅一二處有鹽井。南拉江低地處。有比此更好之鹽井。此處作邊界之故。須查攷其本地史乘來歷。一千八百年間。猛南之土司。亦如西邊暹

羅之別土司進攻江鎮時。並入江洪邊境。將許多居民捉往南邊。餘多逃往北邊。其地向無人煙。直至二十年前。老撾人始來居南奧江之低地。因有鹽井故也。由此漸開至南太江之上游。其地係暹羅人棄去者。數年前暹羅欲越江洪邊界外數英里爲暹界。密士得哥林及別位所帶暹羅測繪人屢入江洪繪圖。被孟拉官阻止。不得成功。

二十五日記

自猛犸東角至江鎮邊界全綫一帶各處地方。查得如下。曰霍南羅。卽南羅江之根源。南犸江之東支。曰班達。

曰班顯曰猛安太曰大庚曰大辣干曰洽潑淋曰好南
募曰好南邁曰葛倫德曰大登雲曰黃庚特曰南紐本
曰浙倫門曰脫辣邦曰山布白克老撾人皆謂往南邊
之邊界係在南分江口及梅松納約距浙倫門之北七
英里

二十六日記

車里分爲十二板納又作猛是以名爲細魄松板納卽十
二縣之意也每縣有一頭目管理而車里宣慰司統轄
之宣慰司前居湄江西岸之九龍山約距江五中里近
居湄江東岸之曉明陽約距思茅六日程 法人葛爾

尼遊歷江洪書云江洪之國分十二猛或作十二板納

茲記其名如左曰猛拉太拉或作臘曰猛紀緬甸曰猛

郎江東門戶曰猛豐暹羅此四處係大縣其餘八縣非若以

上四縣之緊要其名曰猛拉一作猛臘曰猛虎曰猛洪

曰建東近猛曰猛興曰猛邦曰猛衣佛又云名單有時

不同從前包括猛尤在內如是則十三板納矣英國領

事波恩又於一千八百八十五年遊歷江洪亦云江洪

分十三部但未詳其名英國駐曼谷領事阿爾哲於

一千八百九十年冬遊歷江洪據云細魄松板納名目

現已無有矣現在各部之名如下湄江之東曰猛分曰

猛拉曰猛狃

此部又分爲狃紐狃太

曰猛拉太曰興曰建東湄江

之西曰猛紀曰猛蒙曰猛郎曰猛海曰猛星曰王曰分

曰奧曰安曰板曰建陸

英人辣葛里遊江洪時宣慰

司所住之江洪鎮雖仍在湄江西岸而其地位則與麥

克牢遊歷時不同蓋因國內有事老鎮燬爲平地復於

別處建新鎮矣當時宣慰司由緬王封立十二板納之

頭目皆到云

二十七日記

中國山西湖南兩省煤鐵礦脈甲於地球一省可敵歐洲全境之所產惜山西距海較遠又無鐵路運費浮於

工費惟湖南濱湖通江由江達海無處無礦德人蕊克士妥芬所著礦學書盡湖南六十三州縣礦產皆詳述焉可取而譯也貴州清谿已試辦鐵礦礦質與英產較英得十分之三四黔得十分之六七英士歎爲得未曾有乃距水道較遠資本未厚爲可惜也鐵路造費各國不同以歐洲論瑞典一里不過萬金英國一里有費至十餘萬金者人工物價地價造法不同也又觀西人所擬中國鐵道之圖一由印度直通雲南一出臨安以東趨廣州一出楚雄以北趨四川以達漢口一由廣州鑿五嶺以達湖南而會於漢口一由南京至鎮江東出上

海一由南京之浦口西北行踰定遠折而西渡淮沿潁
過陳州西北繞大梁渡河出酸棗由正定抵良鄉趨通
州以達於京師此同治初年西人所繪圖也

二十九日記

總理衙門來書云法使李梅稱前定滇越邊界沿黑江
一名李仙河至孟賓而止由孟賓至湄江地界一段約
有中國二百四十里其間北屬中國南屬老撾湄江西
岸爲暹羅本國現擬自孟賓起與中國分界至湄江東
岸爲止檢出一洋圖指所畫紅綫爲界在赤道北二十
八度零幾分與滇督寄圖普洱府之思茅廳南境盡處

在十一度尊處十七年寄圖思茅南境在二十度餘十八年四月續寄之圖在二十一度均有不合暹羅公使稱暹羅北界至南掌城北五十里而止由南掌城北至思茅廳尙有車里土司等部在湄江東西兩岸者今李梅臆爲區畫將舉車里全爲法有貪狡已極英法兩國於車里南界外商設一局外之地英人欲拓至五十英里之廣法人欲縮至二十五英里駐法英使德斐林告參贊慶常云前聞法外部願將此甌脫地讓歸中國管屬今接本國外部來文知英廷亦願歸中國此地東西闊四五十英里合中國百四五十里南北長一百三

四十英里合中國三百數十里。

出使日記續刻卷之八終